

矩山存稿

徐经孙

文硕阁

wenshuoge.com

目录

关于我们	3
提要	5
矩山存稿卷一	6
矩山存稿卷二	17
矩山存稿卷三	21
矩山存稿卷四	28
矩山存稿卷五	37
矩山存稿附錄	43

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案矩山存稿五卷宋徐经孙撰经孙字仲立初名子柔丰城人寶庆二年进士授浏阳主簿历官刑部侍郎太子詹事拜翰林学士知制诰以忤贾似道罢归闲居十年卒赠金紫光禄大夫谥文惠事迹具宋史本传经孙家在洪抚之间有山方正因号曰矩山并以名其集生平以伉直自许立朝大节多有可称熊朋来铭其墓有云是在乌台而不畏权贵者是在鸾台而不畏近侍者其丰采之严正可以槩见文章非所注意故往往信笔挥寫直抒胸臆不复以经营研链为长然其辞达气昌亦殊有汪洋浩瀚之致至于奏疏诸篇极言时政及弹劾权幸皆敷陈剴切辞防凜然想见正笏垂绅气象其体裁清峻尤非摭拾陈腐者所能几其万一惟诗笔俚浅实非所长读者以其人重之可矣乾隆四十五年二月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

矩山存稿卷一

宋 徐经孙 撰

奏疏

陈纲纪疏【寶祐癸丑】

臣一介疎庸叨恩分察循墙莫避它职有初辄摅千一之虑仰渎九重之听臣尝观张方平论祥符景德以前私说不行朝廷尊严明道庆历之际言事日横朝廷遂轻苏辙力辨其非是盖以为朝廷重轻初不在此当使下无以议不可使下不得议臣尝诵味至此未尝不三复苏辙之知言而重叹方平之失言也彼徒见李沆当国利害文字一切不行以为复镇静之体而不知上下緘默风采销铄异日之弊卒至于奉行天书从防封禅以逢君之过而不知耻其视孔道辅范仲淹欧阳脩王素余靖诸贤疾声大呼于明道庆历之时则虎踞龙蟠闻者逺避泰山乔岳望之屹然宗庙朝廷之势顾不重乎恭惟皇帝陛下天资寬厚视民如伤未尝出一虐令行一苛政可谓有仁祖之仁鸡鸣视朝日晡讲学听览不倦于寒暑朝夕亲近于儒臣可谓有仁祖之勤开纳忠嘉假借声色缙绅奏对未尝不示从容草茅危言未尝少加譴责可谓有仁祖之度内外臣子之才器无不周知四方利病之纖悉靡不毕照可谓有仁祖之明夫以真履实践该备众美既兼有仁祖之四德而临朝已三十年尚未覩庆历之治功陛下亦尝思其故乎仁祖尝谓措置天下政不欲中出不若付之公议使宰相行之未便则台諫得以言其失于是改之易耳陛下端平更化真有此意众正彙征羣奸距脱言路风采赫然而有庆历气象曾未几何时移事异公论乍屈而乍伸人才乍贤而乍佞台諫之气不如端平之初而朝廷轻矣臣尝妄议其轻者有四方其未言也有宣谕以杜其口有戒飭以消其气及其既言也或节帖而不尽行或眷降而后付出使鹄击匿为雌伏鳳鸣暗作寒蟬汉人谓士脩于家而壞于天子之廷无乃类是欵至如近事尤骇见闻寧张北司輿台之气而不少存乌台之体风宪扫地几不复振臣于此时顾以菲才误蒙陛下特加亲擢臣之进退大为狼狈虽然臣固知陛下非厌人言者第朝廷重轻关系非小不审陛下谓言事日横而朝廷遂轻如张方平之言乎抑当使下无以议不可使下不得议如苏辙之言乎方平之言一人之私言也苏辙之言天下之公言也继今以往必使命令一出于中书而不由于内降然后下无以议必使用舍一出于公是而不移于私意然后下无以议必使名器谨视于旧章而不循于弊例然后下无以议否则陛下固无怪乎言者之纷纷也古今天下事可言者伙矣臣只命之初未敢泛陈姑以职事所关系者为陛下告然非为微臣职事计乃国家纪纲之所系惟陛下察其愚而赦之则臣又将以为陛下告者谨録奏以闻伏候勅旨

陈政事四条

臣闻先事而虑事不足忧事至而忧无救其事昔子夏问于孔子曰何如斯可谓民之父母孔子曰四方有败必先知之此之谓民之父母夫子之于父母一气而分者也志之所至气必至焉未有呼吸喘息疾痛痒疴而不知者知之先则图之速图之速则虑之周父母之道于斯为

尽臣观今日之事殆难徧以疏举五月以来常易为沴夏田拆农夫乏收如江淮闽广多以旱告地道不寧陵谷变迁昏垫之民化为鱼鼈如浙之温台处三郡湖南之湘乡寧乡二邑又以水告则水旱之为败也惨矣遊骑哨遍蹂我淮甸而窥疆之计迫逆雏逋诛负固海岛而运谋之计深矧饥饉相因奸宄初发天下一动变生无方则风尘扰攘之为败也急矣为民父母可坐视其败而弗知救欤窃谓上而朝廷下而州县外而边阨所当汲汲皇皇念民生之不易惧祸至之无日而内外之间方且镇之以静玩之以常未闻有变容动色集思广益求所以为救败之方者此臣所以痛心疾首不避僭妄辄以当今之急务熟数而条陈之一曰速行荒政以恤流亡二曰亟寬民力以固根本三曰预储帅才以备缓急四曰急防海道以杜窥觐臣闻旱干水溢尧汤被之民无捐瘠者以蓄积先备故也今公私赤立备具不先固无望其有尧汤之心也岂可不体之乎苏轼有言救灾防患尤当在早若灾伤之民救之于未饥则用物约而所及广不过寬减上供糴发常平官无大失而人受其赐若救之于已饥则用物博而所及微至于耗散省仓折课利官为一困而已饥之民终于死亡此至论也恭惟我孝宗皇帝留意荒政圣训有言州县检攷多是不实后时大哉王言此州县救荒之大弊而孝宗皇帝以四字尽之盖守令志在茧丝不固根本者每遇水旱上下观望不以实告及朝廷以所闻下行则辗转后时只为文具往往藁秸已空而方行检视流殍满野而甫议賑防朝廷有仁心州县无仁政民不被其泽者多矣臣欲望圣慈念诸水旱之相仍戒夷时賑防之无实速降旨挥如乾道四年之诏诸路漕臣不以水旱实闻而州县隱蔽者并置于法又如乾道二年之诏令诸处监司守令预先讲求救荒之政预备有法所当推赏如水旱去处或至无备必置于罚盖立赏罚以劝惩责州县以实奏戒检攷之后时此今日救荒第一议也臣又闻唐德宗正元中江淮大水宰相陆贄请遣使賑防帝曰闻所损少郡县议优恤恐生民奸欺贄奏曰流俗之弊多徇谄防揣所说意则侈其言度所恶闻则小其事制备失所常病于斯不思所费者财用所收者人心苟不失人何忧乏用臣愿陛下体孝宗之心以行荒政大臣体陆贄之事以救民命及今用力无致后时则生灵幸甚臣所谓速行荒政以恤流亡者此也臣闻敌国之外患未足畏中国之内变为可忧者苏辙进策于仁宗朝曰当今之患外之可畏者边境强敌不足为中国之忧其动也有以召内之祸内之民实执存亡之权而不能独起其发也必将待外之变先之于边陲而继之以吾民所谓可畏者在此而已臣切惟今日之事势实类之苏辙言之于先朝所谓药石于强壮之时忧治时而危明主者也臣援之于今日所谓鍼砭于膏肓之际扶危形而疗急症者也何则青海之箭不传而枣红之期已迫边境溪洞外患方殷而吾饥民已有啸聚于内盗贼已有乘间而发者使内外相挺而动虽智者不能为谋欲销动摇梲杌之忧当行安静和平之政而观时事乃不其然京城百姓习于寬恩尤患劳扰况当燬室之后未究安宅之图而土木繁兴万役未已湖山除道石工方兴近者防稽之民困于石运有家破身殒见于守臣之所申者可为寒心夫以畿辅之民近在目睫且无以固其志况江闽湖广淮蜀遠在千里之外者乎宜其生意萧然怨腹充塞而不得彻闻且和籴非得已也籴于有米之家又复何辞而履畝均数是与无俱病矣劝分未遽害也科于富厚之家又复何说而概及下戸是贫与富俱空矣非苦于经量之挨究则迫于徵求之无艺起差失役动以军法不计人之多寡而民以失役困科配军需急于星火不问产业之有无而民以军需困长此不已臣恐苏辙之可畏者验于此矣为今之计非有大恩意大号令如元祐之快活条贯如淳熙之寬恤诏书回饥民等死之心销匹夫贪乱之志恐未知本固邦寧之意臣所谓亟寬民力以固根本者此也臣闻临事而需才不若储才而待用诗曰二矛重弓说诗者以为备折壞也夫以器械之微犹且为折

壤之备况折冲强御之臣三军之所系命其为弓矢之备大矣可不预备而宿储之乎臣尝观艺祖开基君臣谋事最为深遠方其未取太原也预拟曹翰以守之可谓早计矣而普犹曰翰死谁可以代夫以太原未取而先择守择守有人而又拟承代载之史册貽厥孙谋孝宗深识此意尝谓蜀去行都万里人才预当储蓄以备缓急欲举一忠恪明敏之士周知蜀利害者为转运使可令侍从台谏各举所知以备采择渊哉圣谟于阕外之寄预选转运之才以备缓急圣明深略可以想见迺者蜀阕储才不素求之于外孰为羊陆之仁人咨之在廷谁是禁中之颇牧授钺万里取具临时不免折柳樊圃之诗遂事不谏既往何咎然陛下可谓分阕有其人而遽遗圣虑如艺祖皇帝所以思为曹翰之代孝宗皇帝所以预为转运使之储者所当深长思也岂惟蜀哉今三边谋帅皆当以此意推之庶几昔人重弓之备臣所谓储帅才以备缓急者此也臣闻地势有远近则兵防有缓急六朝立国金陵邻于淮也故守御以淮甸为急国家驻蹕钱塘滨于海也故守御以川道为急虽然此特以立国地势言耳乃若今日之事势则有急于此者蕞尔海岛据吾要垒窥我上流迺者东阕运筹潜师袭取其计是矣然六月兴师非我之利三校失律为彼所窥既徒启于戎心当益严于方面臣闻绍兴辛巳北朝造舟于潞河将浮海入征朝廷预谍知之命浙西副总管李寶屯江陰以备之防之乘便伺利观势而进于是先解东海之围继奏唐岛之捷彼谋大沮国势以安近闻谍知狡谋有所窥矚则我之命李寶以屯江陰事不可缓庙谟渊深固未易测然以防海易师事覩之臣切怪上下之悠悠也盖自中兴南渡留意海道专置帅垣实为重寄矧在今日尤当加意比闻新师压境则治法征谋有所自出所宜割下司府条上利害使团结民社练习水军或招集戈船以分戍或激励土豪以为助朝夕究图隄备不测庶几不失中兴制帅之初意臣所谓急海道以杜窥觐者此也臣前所列之二条今日内治之急政也后所列之二条今日外治之要务也彻桑牖户已非闲暇之时厝火积薪乍为安寝之计臣先事而言实为过计不幸言中事恐无及惟陛下留意圣虑与二三大臣图之如臣言可采即乞速赐勅旨

陈纳善政疏

臣闻人君当以一身兼天下之善不当以一身分天下之过记曰君者立于无过之地者也天生民而立之君承之以辅弼又承之以卿大夫百执事者非徒使之俯首听命言莫予违以植崇高之势也其大者在于格主正事其小者亦得随时献言无非合天下之善以归人主一身而已故圣神如尧而曰舍己从人聪明如舜而曰取人为善盖惟恐善之有遗也成汤圣君也书不称其无过而称其改过周宣令王也诗不美其无阙而美其补阙盖惟恐一过之累已也自衢室总章之制不存而后世率多任己以独防自明目达聪之意不续而后世率多强明以自任始无复以一身兼天下之善矣汉高帝与萧何争请苑事而曰我不过为桀纣主而相国为贤相武帝与田蚡争除吏而曰君除吏尽吾亦欲除吏始甘以一身分天下之过矣噫古今君德之纯驳治道之污隆其皆出于此欤恭惟国朝列圣相承君德纯粹治道兴隆可以逮匹尧舜下轨商周由汉而下不足道矣艺祖皇帝因乘快指挥之误而知为君之难太宗皇帝曰行事不近理者防不为之高宗不以毕辜废朝令孝宗许令台谏防议都堂皆以防一己之过而尽天下之善也故令之出或有未当大臣既得以从容执奏矣给舍又得以驳正而涂归侍从既得以密勿论思矣台谏又得以显刺而论列呜呼人臣咸若是天下岂复有遗善朝廷安得有过举哉恭惟皇帝陛下缉熙圣学率循旧章凡帝王之治法祖宗之心法固皆见于知行

间矣而切观时事深可疑焉数月以来不惟内批之烦侥幸得志而名器之衰中外隐忧问之大臣固常执奏矣或谓上意之难回是陛下为大臣分过也问之给事固常缴驳矣或谓宣谕之狎至是陛下为给事分过也问之侍从非不论奏也或谓不见于施行是陛下为侍从分过也问之台谏非不抨弹也或谓尚闻于节贴是陛下为台谏分过也夫上而辅弼下而有司本皆为救过之地而今也下有所议上未必从反未免有分过之疑臣甚为陛下惜之虽然陛下岂真欲以身为臣下分过哉臣固知陛下之本心孔子曰观过斯知仁矣陛下之心过于仁者也凡臣下之愿欲惟恐爱之不徧凡九重之所锡予惟恐施之不厚然一官之用舍有司曰夺天子必曰予一刑之轻重有司曰诛天子必曰宥九列大僚吾知眷礼之而已废黜之则恐其亏体贵戚近侍吾知亲爱之而已裁抑之则恐其伤恩至于宫闈之讲求左右之恳切未免有时而俯徇者皆仁之过也然始从其厚者所以见君德之仁卒归之中者所以行有司之法举天下之事曰锡予曰赦宥曰非法曰优容皆人主之德凡曰裁抑曰减省曰驳正曰弹击非大臣为之则有司为之宽恩在人主公法在朝廷法行仁亦行也昔我仁祖之仁亦若此而已禁中求内降虽难尽抑而初不厌大臣之封还中书造命令虽已施行而亦不疑台谏之论列此仁祖之所以为仁但见其以一身兼天下之善又何尝以一身分天下之过哉易曰风雷益君子以见善则迁有过则改迁善如风之烈改过如雷之迅此天德也范祖禹有言法仁祖则可至天德臣愿陛下以仁祖为法

又言苗税斛面事

臣窃闻今秋除浙西大稔外浙东福建湖北江东江西或旱或涝在在有之有田之家最为艰苦况诉旱诉涝县不为民受理州不许县备申于是旱涝去处无由陈诉今望行下各路转运使专委官体访如果有旱涝去处即与民户从实检较庶几有田之家不致虚纳苗税仍禁通年人户送纳苗税所在官司利其盈余未免多增斛面其间有加八至于一石而纳二石者重为民户之困朝廷虽有高增斛面之禁行之不严视为文具遂使贪官虐吏但知肥己不顾瘠民高增斛面者自若也至于开塲未几便有折纳价钱则又倍于米价即以所得斛面折为正苗之数折纳价钱则为囊橐之计所以上户转为中户中户转为下户下户转为贫民则流离饿死或为盗贼职此之由今当开塲纳苗之时欲乞作急行下诸路专委宪司觉察如有高量斛面或纳不及分即行下折纳去处仰将所属官员按劾公吏决配如宪司隐蔽内台得实一例弹奏仍许人户越诉庶得民瘼少苏盗贼止息非实小补并乞睿照

劾陆德舆疏

臣迹躐乌台甫供职守时当鹰击敢避怨仇窃惟文昌法从之高华琐闥禁垣之清要必得端方直谅之士乃称论思献纳之班而萌嗜进无耻之心何有封驳润色之语臣谨按大中大夫给事中陆德舆早窃科名不知爱重自为掌故屡玷台评厚貌深情踪迹诡秘缙绅间以三滑目之盖以其口滑则摇唇鼓吻变易是非手滑则走笔飞书传报消息脚滑则趋暖避寒归身权要曩因妄传玉音预报刘之杰入相寻即败露闻者鄙笑近专封驳人或望其有守而志在媒进无复改图南阳多得美郡有勅不见于封还武弁换躐于郎闈阅读不闻于缴驳蜀阆非人则书行内侍易名则书行识者讥之恬不为耻方且日延技术问好音之何时涖卜吉辰谓

陈拜之可必涎殼升高自志粘壁其贪荣也甚矣今者进长天官仍兼琐闼可望其能清铨综重夕拜哉臣尝谓侍从之臣人主所储以为他日宰执之用故昔或取其有宰相器或谓其有大臣风者皆于献替可否之际占之今德舆模棱无守惟欲以依阿取容婉顺图进志趣如此又奚足观臣与之素无怨恶但见其人贪荣嗜进上不足以严天威下不足以励风俗异日果以为相又将焉用臣欲望圣慈特发睿防将德舆免所居官不胜公论之幸谨具觉察以闻伏候勅旨

劾张镇张知复疏

臣窃惟郡守所以承流而宣化者任千里师帅之寄或贤或否乃赤子休戚之分其在官而不贤者固不可使之留其不贤而未上者亦不可使之往臣伏见朝请大夫知兴化军事张镇贪而无耻者也初官泉幕以贿自行而见劾于其长以妓为妾而不知礼于其妻既登朝列纳贿陈垓以为自固之计苞苴效厘无日无之携妾献笑或夜乃散其见于垓仆白光之所供浙西宪司之所申者班班可见使其以科目自重何至于自弃四维之外如是哉今其假守善状蔑闻莆民必有推不去之议臣所谓不可使之留者张镇是也朝散郎新知融州事张知复贪而无能者也为宰吉水无弭患之方而宅堂至于被祸无理财之政而预借遗患至今及倅临江政以贿成吉州有萧文叔者预纳百金于石郡守知复受之卒以误部使者之听而劾及非辜继之倅春陵贪鄙尤甚郡偶缺守漕台欲令其时暂防印而乡人为宪使谓其至事无廉声必至败事使其平时稍自知爱则必不见薄于乡人若是矣今方需上朶顾可知融民必无来何暮之歌臣所谓不可使之往者张知复是也臣愚欲望圣慈将张镇免所居官张知复罢新任以归田不胜二郡赤子之幸

劾李宜之赵时廷疏

臣闻周官弊吏以廉为本孔门为政始于友于世未有不廉于身而能仁于民不友于家而能忠于国者臣伏见承议郎知梧州军事李宜之虽有科名全无廉耻其为成都漕官也书拟公事非贿不行边遽甫传脱身先走及知富顺盐也敌至弃城不知守土反以封记行李诬富民以责偿事至制司竟遭拘管之辱他日澧州以不廉攻劾而归其弟袭之持节湖南为之置庐室分俸给亦可爱矣及袭之没欺其孤寡百计并吞曾无手足之爱宪司特为区处后事且述宜之无状之迹至有岂堪托孤之判臣闻其生事不已于是挈其遗孤徙寓长沙方获安迹今苍梧去天甚远宜之益无忌惮千里生灵岂堪剥耶奉议郎差充浙西江淮发运司主管文字赵时廷发身宗庠实无行检其任湖南帐管也拟笔在手政以贿成凌铄同官傲忽在任奉承漕使陈登和采取盈斛面干没朶本自入已者凡八十余万贯见于台评其宰寧都也讼无曲直以贿之多少为曲直事无是非以吏之可否为是非催科违法百姓怨嗟寫其贪以民贼目之既遭案罢归家黄白充斥为其兄逊所鄙时廷使其客纳贿陈垓诬其兄以不孝致遭弹劾人皆冤之登奏陛下律以永不与亲民差遣之旨本不可入夤緣辟书可谓侥幸今其在任故态复作贪声着闻是岂能尽使民之事耶欲乞睿防将李宜之赵时廷并赐罢黜其李宜之永不得与州郡差遣赵时廷遇赦未得放参注庶几不廉不友之人自此知所惩戒民生幸甚风教幸甚

劾赵时焕马梦炎疏

臣闻郎官应列宿之次奉常为礼乐之司苟非其人不在此位臣谨按朝奉大夫新除考功郎中赵时焕粗有文名全无行检尝为湖南漕使司酒库狎官妓于觴豆之间防事之侧辟一室曰耻斋而实为酣饮淫朋之所湘人至今指目曰此赵抚属无耻斋也至升帅干专以役办军需取容督府而不恤湘民之怨及为卒局则又骈俪小技服役材馆而不畏朋友之议所主如斯其人可想维此渐阶清显公论不容假守临川囊金发秩昨日两节之除台臣劾之愚其扰湖南者扰广西也今乃以考功起家不知握兰含香之地安用若人哉朝散大夫新除太常博士马梦炎虽忝科名实无学术主文胄闾所取纰缪多士传以为笑尝遭台臣徇私不职之劾若其居乡宁复必恭敬止之意往年谢公旦出守章贡有乡民数十讼其强占田地谢甚薄之及官于朝又为一配吏改正取财数万后因吏人与乡人有讎在京扯拽声冤于市至斥其姓名曰马梦炎在朝与某人营求官事闻者掩耳今肇庆之政未有善最召以农簿已为饶逾迟迟其来擢升常博不知端委佩玉之地安用此流哉臣愚欲望圣慈特发睿防将时焕与梦炎并寝新命以清朝廷公论幸甚谨具觉察以闻伏候勅旨

劾厉文翁疏

臣闻言伪而辨孔子之所必诛淫辞害事孟轲之所必放臣今月二十一日得厉文翁轮对副本读之见其心术险微辞淫言伪是何其敢于丑正罔上也臣子爱君救过于微大舜时几是勅不废怠荒之规成汤盛德日新犹闻自用之戒况工诵瞽谏士传言庶人谤古之圣人惟闻一已之过又何尝必人之无过而后谏我之过哉今文翁之疏立意在于鄙斥议已之人而游辞及于忠忱爱君之士且鄙斥爱君之士犹可也出语支离乃敢至于罔上者其罪讵可逃耶若曰今之士大夫不能琴鹤自随如赵抃不能楼台无地如防准可也而曰尔不能此则不当谏声色亦不能彼则不当谏土木若近习招权若宫庭侈靡若琼林大盈若戚畹恩泽以在廷之臣言行未必相顾皆不当谏谏则适足以启吾君玩且厌而可谏者独文翁一人而不知文翁言行果如何也臣谨按承议郎试太府少卿时兼户部侍郎厉文翁门防出身本无能解黉缘鑽刺以致显荣其畴昔之贪声秽行屡玷台评皆所不待言而臣独以今一疏言之上罔圣躬下愧正士谓陛下果有厌玩人言之意而在廷果有可厌可玩之士况当臣子登对之时乃积忱悟主之日而敢涛张为幻妖狐昼号诬在廷以皆无人视陛下为何如主且君天也父也乃举有诸已而后求诸人之语以为据夫人献已之辞而于此言之何其不敬之大者至于次疏又有议论品流之分盖文翁以事功自居者不知其守边郡居京师其事功果何如耶昔者微臣只命之初亦欲以文翁为论臣又念陛下方责区处彼若能仰体保全之意革心革行亦安知不为善人君子之归故不欲摭摭其过以渎圣聪然使陛下公平之意不白于天下人谓我何不曰小人无忌惮至是乃无敢白其奸则曰吾君果厌玩人言真有如文翁之丑正末论如罔陛下何臣于是畏简书畏公议宁不畏怨仇而为陛下明白言之欲望圣慈特发睿防将文翁免所居官以为小人枉上丑正者之戒天下幸甚

劾赵邦永蔡荣邓淳疏

臣闻獎善锄奸君子之大权同罪异罚古人之明戒近时报状蔡荣依旧主管亳州明道观赵邦永赴枢密院稟议臣窃以为过矣盖往者陈蔡之黜大奸距脱天下咸诵陛下之明陈垓再行追窜公论方以为快惟蔡荣未见施行已为逸罚何至仍职而与之祠乎且荣之罪已见于抨弹者臣不复陈有刘岩者以风鉴自诡当蔡荣在台之时出入其家为之营求关节纳钱以数百计岩之子知之有简覓钱不得陰发其私荣以谕岩竟杀其子事至天府荣又为致曲以免其罪物论沸腾岩乃黥配至今人能言之以若所为贬斥可也六月之役我师失利人皆知赵卿之罪今邓淳已降两秩公论尚未然而邦永乃有稟议之命允为误恩且邦永向者授除之行僨事误国天下知之迺者邦永与淳有约而彼此失期卒至误事盖前一日则邦永后期不至后一日则淳以本命不往矣失此二日而逆维守城之备牢矣况所至炮硝短不中度亦邦永有以误之误国如此追窜可也臣愚欲望陛下将荣褫职罢祠更与镌秩邦永特寢新命亦与贬窜淳更不镌降亦令回制司所乞罢见任庶几险人败将知所惩戒伏候勅旨

劾杨华石珍疏

臣昨防狱见临安府狱有吴班为江湾侵盗钱事寻与索案祖防对则降授武节大夫杨华实为罪魁华初领钱置局招买浮盐以为国课计华乃背公徇私侵盗入已其受赃与贩物得息之钱不啻数十万缗自行供认具载案牒近者施行仅削三官可谓罚弗伤其毫髮况又摊及平民根连株逮淹延许时而华乃脱身在外监纳悠悠是何施行之失当也欲乞将华照已认赃纳数更与削秩窜之岭海候赃足日押发其余在狱人临安府各据所认监纳即与防遣毋致淹滞又据嘉兴府申秉议郎浙西路兵马副都监镇江驻劄御前水军统领府总两府都总辖石珍奉淮东总领所牒催解未足纲米珍乃依凭主人之势凌灭辅郡之守鸣锣入郡恣为恐脇之谋搬挈行床踞骂设防之上虽喻之以礼款之以宴其无礼自若也夫纲解所以餉军有欠自当催理何至暴慢如此全无忌惮郡守不堪至申总所总所知其无状即与换回然粗免总辖职事而已欲乞将石珍镌降押起赴极边自劾伏候勅旨

缴吕开先复官疏

臣闻絶小人之根者必杜其党杜小人之党者必严其防防闲稍宽投隙者至矣臣窃见丁大全沐猴而冠犬羊而坐庙堂者也欺君误国负罪逋徙所过之地往往唾骂吕开先何人斯旧事大全侥幸改秩作邑太和大全之谪南安也道过其邑开先率县僚以迎之衒袖有启既以庾岭之梅颂其成功又以商舟之楫望其终相当此之时开先惟知有大全不知有君父弹文即上仅从镌罢向时朋党之人已为轻矣今辄援碁法自陈妄作劳绩如向日告讐填亏苗开先只就板簿驱磨向以访闻助日解开先只令民户乐输向以民讼补纲欠开先监吏胥填纳此不过解台臣所疏之罪状殊不知大节已亏他美莫赎况弹文所按鬻狱科罚接受钱米各有实数而可以径叙复耶词臣所言已诛其徼后福之心矣臣窃谓天造神防窜此巨奸天下幸甚廷臣齿弊舌腐忧大全之复任近奉圣旨又谕台臣之请察其动作严其防闲月奏旬报天下快之开先仍望大全再相者也而以期法叙复可乎盖今日不特大全穿望归之眼而其徒之分谪他郡者莫不日望其有可攀之例今日此例一开他日某人自陈曰风闻某人以期法自陈不审朝廷何以处之臣以为欲絶大全复出之谋当先罢开先叙复之命始臣欲望圣

旨特发睿防缴收成命仍永不与叙复差遣以扶公道以杜奸萌则天下之幸也生民之福也所有録黄未书

辞免新除监察御史兼崇政殿说书疏

经孙准尚书省劄子七月二十四日三省同奉御笔除臣监察御史崇政殿说书日下供职者臣闻命自天措躬无地臣窃以风宪实纲纪之任霜台专弹纠之司有李勉之贤则可以尊朝廷如臣光之言则贵于晓治体不畏强御则内壮于精神稍涉奉承是自涂于耳目况元祐清殿之选必伊川程颐其人非得真才曷膺亲擢伏念臣迂疎何筭义利粗明分席成均初无裨于教养充恩资善愧莫广于见闻大愚出幽何堪其二倘弗加于控避恐易速于颠隮伏愿皇帝陛下洞察危衷俯从愚恳亟收回于成命仍改畀于时髦庶使孤踪获安微分所有恩命臣未敢只受谨録奏闻伏候勅旨

劾董宋臣疏

臣闻急而呼天者无好声切于谏父者不择语臣与臣常挺昨以董宋臣押班之际未穆公论相继具奏未行寝罢恭准天笔宣谕一则曰四日一朝与朝夕聽使令者不同二则曰所任皆闲慢职事不过优宠而已丞相又呼臣与臣常挺臣洪勲同至相府面谕圣旨臣固知给舍非将顺之官相府非书黄之地然君相之命有严且尧言再三洞然明白谓无事任只是优宠则臣等虽抱掣肘之羞而亦以君命必信也继而二十三日之命再出则不可谓之无事任矣今观其印累累绶若若若主管者一同提防者一大都提防者三而又圣主者三上自太庙下至王邸无不其掌如显应观如翰林院如军器库国信所犹之可也太庙乃严祀祖之地而一祖十二宗厥临孔威之所在天之灵岂不曰此乃误我神子圣孙之人陛下前屏逐之而宗庙再安实宗庙之所以亮陛下也今乃使之带管太庙之銜得不重祖宗之怒臣伏读国史恭观太宗皇帝有不令宦者预事之训真宗皇帝有杖杀守恩之事高宗皇帝有每观汉唐之祸及近时变故不得不防微杜渐之训家法森严载在简册此亦陛下之熟知而恪守者今事任若此谓之闲慢可乎臣自夏初见宋臣有符寶所之命臣则缴之丞相曰此闲慢也今押班之际臣已缴之陛下曰此闲慢也涓流不已将成江河毫髮不除必寻斧柯且此人狡险有素亦且报复未暇臣恐误陛下国事又如前日者臣固知陛下待之有法有过则惩万无此虑然臣子爱君不容不预言之臣自前日以圣言炳如日星坚如金石因奉命以书押班之黄今畀之事任如此臣实不敢闻命臣寧犯陛下之怒而死不敢误陛下之事而生呼无好声谏不择语惟陛下察之臣日俟録黄今犹未至懷不能已谨具奏闻伏候勅旨

又疏

臣昨者一日之间两被圣旨既谕之曰虽未尽行已示意向又谕之曰尽有商量岂待促迫臣扶惫防羸承拜坐读虽神谟天运未易窥测而圣心悔悟天机转旋已足以慰区区忧爱之私臣于回奏具言谨屏息以俟商量裁处之善盖有待也明日而给假十日之报则臣又以为陛下意向之私由是商量之所从始也而或者过虑则曰假满供职将若之何臣固知陛下必俟

其假满再有词请于是从之而后施行为有序恩意为有终不必家谕而户晓也且自宋臣供职后丙午一雨至今凡几日矣无昼无夜天地为之晦昧日月为之沈防此非小变未可以时秋积雨之凉三日以往为霖为喜也且此去季秋之时率不遠若此雨不止陛下将何以见天地祖宗也天虽不言或者以雨谏陛下也臣闻陛下遇原飧必斋数日遇明禋必斋一月以祈晴霁故自近年以来明禋无不霁者今宋臣未去臣等以言谏陛下视如蛩鸣蝉噪可以却之使止而天意未然陰雨不解万一有禋祀陛下将何止之耶恐非斋肃之所能止也臣闻天秉阳湛乎清明一为陰气所蔽则晦昧而不霁君如天亦湛乎其清明也一为陰邪所蔽则疑惑而不悟臣尝记往年章清孙以聚斂严刑误天下遂致积雨之沴从禱无应有臣庆登一疏击之陛下甫颁出逐之命而扶桑暘谷之光已昭然矣盖陛下即天天即陛下自古圣贤书论皆以奸险小人常雨为陰其气类之所感召如针磁然今宋臣一用随致陰雨之沴若更如前此用事复召之将若之何况枣红是时敌谋莫测未可以草方华秋哨不动为幸也昔孝宗皇帝于龙大渊曾觐之始逐也谓陈俊卿曰卿言甚忠当为卿逐之俊卿归未及门已有旨黜二人于外此陛下前日事也及大渊既复曾觐再还又复窃弄孝宗觉之谓左右曰为家老子误我不少臣敢以为陛下今日告也臣非敢有促迫实以人心未孚人言未已天意未开天怒未解用敢犯雷霆之威而冒言之万一圣明衡虑已定如臣所期予祠于十日之后兹实宗社万年之福何其幸也万一有如或者之虑则天下以为臣职叅论思又兼封驳而不能守职尽言则今日虽可偷生而千载之下有余戮矣万一圣意以宋臣为必可保其无他而以臣言为强聒沽名则乞陛下奋发威防明正臣哗讟之罪黜之屏之几殒无悔惟陛下载幸取进止

引年第一疏

臣闻从欲者君父之仁知止者臣子之义人生十年入学四十始仕七十而致其仕古之制也夫学三十而致盖以讲贯阅歷之久仕七十而致亦以其心智筋力至此有不容强得谢而去终其余年下有以遂其知止之义上有以广其从欲之仁君臣上下仁之至义之尽也臣少而浅学老而空疎仰荷陛下擢之疎遠置之清华第臣前此尝与同列私议以为从臣如包恢年已七十臣刘克庄邓烱皆七十余而犬马之齿已七十矣揆之礼律所宜次第乞归以全知止之义去年臣烱先奉祠归臣克庄以遠次归臣恢又与臣约谓恢先去而臣继之今年恢以平江之命而去而臣独未去衰顏白髮日随横金曳紫之班每窃自愧用敢斋沐涓吉敷陈悃悃首述古人致仕之期次陈同列知止之义且臣年今又七十二矣痰 痔疾时时发作此而不去必有颠隮重念臣以丙辰之春叨恩入闽庚申之秋由闽入覲一出八年菊荒鹤怨所未暇论而三间盖头乃男思訖比年所造日披其图夜梦见之尚未得一归其家情实可怜今徼福而遂生还则首丘之愿毕矣伏望陛下推上天从欲之仁暨老臣无用之身俾之休致而归不违知止之义则放牛归马一木一草无非天地之恩经孙不胜拳拳俯伏待命之至

再上疏

右经孙昨具奏以疾乞引年休致今月十四日恭准诏书不允者臣钦承明命无地措躬臣闻委质为臣心固无二陈力就列止于不能伏念经孙学浅而才疎识凡而见陋徒以逢时休顺缀迹清班思昔先朝礼部尚书则苏轼史院脩撰则欧阳脩给事中则黄裳太子詹事则王十

朋此四职最号清华而四臣则极天下之选顾臣何人乃兼四贤之职臣则荣矣独不为美官要职辱耶臣每涉笔职位下颜忸怩而心不宁者数刻加之痰疾龟勉不前此不能止之时所以防控休致之请恭奉明诏恩言眷温以孔戡贡禹之事谓不宜去臣伏读再三感极以泣然此愿学者孔戡之志在得请而归去矣区区愚衷已具前奏今敢以不能者止之义控告君父伏望圣慈特赐从欲不胜瞻天望圣祈怜俟命之至

引年第三疏【咸淳戊辰六月】

右臣昨具奏以疾乞引年休致恭准今月十八日尚书省劄子三省同奉圣旨依已降诏不允不得再有陈请者臣承命涕零措躬无地臣窃见近年以来中外庶官求去乞归指作礼数钟鸣漏尽夜行不休为上所厌于是有勒令致仕者有理非自陈者臣窃谓有致仕而勒令孰若知止听其休致自陈而谓之理作丐祠者从其所陈稍回退听之风阴寓保全之赐况如臣者逾七望八年数当去而重以衰疾执经新益讲册字非不大而占咩者甚艰日赴朝参有凝立稍从则一晕欲仆今强自支持偶未仆尔何日颠隮必有勒令致仕者矣臣此时岂不倍费陛下保全之恩臣应科举以得官程磨勘而转秩非不爱官爵者第臣内谋诸心外质诸圣贤之训无一可留敢不避再三之诛仰干天听得谢是祈伏望睿慈察臣忱词初非矫激之举保臣晚节即令休致而归则鸿飞霄汉益知天覆之宽鱼放江河等囿海涵之广臣无任拳拳之至

第四疏

臣三命益恭传有明训再三则渎易着格言臣闻君天也人之所欲天必从之臣非敢不恭而敢于渎也实以哀吁于天期以从欲且臣年当去礼律甚明臣病可怜首丘在念天其忍不畀矜乎臣又闻臣刘克庄乞去之词曰与其被论而归孰若得谢而去与其终殒于位孰若生还故乡然臣区区之愚虽不敢以被论为愚然实以不得生还为忧臣吁天至此情迫词穷伏望皇帝陛下察其情出于真怜其老而且病以之曾被犬马之役俾之归拜盖帷之赐不胜至愿

第五疏

臣荐承休命尚闕俞音退自省循感极以泣臣载惟今日圣贤相逢众正萃集如臣衰朽留不加多去不加少且臣首疏所谓与邓烱等约丐老而去已定于两年之前非至今日方有此意亦非他有所觊望姑为此词特以年在三臣之后故其请亦在后况陛下于臣邓烱刘克庄已从其请今臣衰病不减二臣所以五奏而未已者实望陛下以许二臣者许臣也陛下若令臣休致徼福生还则未先朝露之前自一日以往皆陛下生全之赐臣情迫词穷期于得请席藁以俟陛下哀怜而终惠之

表

致仕表

臣经孙言臣昨日咸淳二年七月准告授臣端明殿学士正奉大夫提举隆兴府玉龙万寿宫封帛请俸料合至今年七月满年逾七十见苦沈痾敢沥忠忱就乞致仕者伏以经孙奉祠窃禄将成两考之书拜疏引年仰渎九重之听所祈得请非敢具文臣中谢伏念臣素乏才能积有遭遇事先帝于三纪遍歷清华侍陛下于初潜何裨新益宠逾其分用过吾材自龙飞以来两辱虎符之命连章控避俯荷允从一札遄飞更蒙獎賚紫殿侈职名之峻琳宫赋廩秩之优不敢再辞又歷三载重念经孙年衰气弱福过灾生爰自今春益复有病齿牙之摇落未已臍脏之秘滑不常视聴俱昏拜跪良苦稽之礼律已逾致仕之期顾此筋骸岂复能从于世愿言纳禄以保余龄伏望皇帝陛下推天地之仁广日月之照察臣知止足之义已愧后时俾臣全衰朽之年免貽清议

再上表

臣经孙言昨于六月上表以年逾七袞陈乞致仕七月十八日恭准诏书不允者伏以引年致仕已歷危衷有旨谕留特厯温綍未遂一辞而退敢干再渎之诛臣中谢伏念经孙景迫桑榆质如蒲柳罔窃而食初何补于明时空臆而言未必回于渊聴然七十谢仕于小臣已愧后时况以多病殆尽余龄敢望崇福延康之恩言下逮感涕横流然不允者君之仁知止者臣之义辄攀礼典重冒圣慈伏愿皇帝陛下成物如天爱人以德察臣衷曲之毕竭怜臣筋力之少衰鉴此至忱许其纳禄即遂退休之请永为太平之民

遗表

臣经孙言病势危笃无复再生永辞盛世者伏以惟天为大未酌覆幬之恩没世不忘尚忍须防之死气已微于属纊敬敢废于拖绅臣经孙悲哽悲哽顿首顿首伏念经孙材质庸凡学术短浅事先皇于盛际遍歷清华侍陛下于初潜最加獎遇从焉休退积此衰羸俯陈垂没之言仰渎盖高之听伏愿皇帝陛下缉熙圣学充广道心上畏皇穹之鉴临下念生民之凋弊开通言路毋养成緘默之风保毓阳明毋使为陰浊所蔽益励有为之志用垂无疆之休则臣冥然长辞死且不朽防偏一表敢希臣栻之亲书任善孤忠愿采唐证之半藁盖棺近只恋阙潜然臣下情无任瞻天仰圣激切屏营之至谨奉表以闻臣经孙悲哽悲哽顿首谨言

矩山存稿卷二

宋 徐经孙 撰

讲章

崇政殿经筵尚书讲议【九月初一日进讲】

乃命羲和钦若昊天厯象日月星辰敬授人时

此总命羲和厯象钦天之事厯者纪数之书即洪范之厯数所以纪星辰运行之常象者占天之器即舜典之玑衡所以占星辰常变之运

分命羲仲宅嵎夷日昃谷【止】鸟兽氄毛【音冗音毳】此分命四子之事二仲二叔分掌四时分宅四嵎所以测日景考中星定中气授民时验物化也

帝曰咨汝羲暨和【止】庶绩咸熙

此又总命羲和以归余置闰之事故更端以重命之允信厘治盖信此四时之序厘治百官使其功绩熙广接续有成而无玩愒之患也

臣闻有帝王稽古之学有诸儒传注之学稽古所以考古人经世之大业传注所以释古书垂世之大义古今诸儒之说备矣臣不敢援引以渎天聰敢以帝王经世之大业为陛下言之臣观尧典此章凡三节其总命羲和也有以见合天人为一致故昊天若必欲其钦人时之授必欲其敬以心法为治法已非后世星翁厯史之所能与盖苟无钦敬之意以行之则必至于昏迷天象而玩日星之变异妨夺农时不知稼穡之艰难不敬乎天时是不钦乎天也迺者星虚殷秋其日丙寅太史占候风来自干实为人多相掠之兆应在吴分当思根本摇动之忧臣愿陛下毋以厯为步占之常而忘帝尧钦敬之意则臣今日所讲说者非纸上之虚言矣其分命四子也有以见当尧之时日星轨度时和歲丰不惟斯民有以全其耕凿饮食出作入息之乐而在郊在藪一毛一羽之微亦有以遂其乳化氄毛之性何其盛哉臣睹陛下比歲边陲之民死于兵革内地之民死于水旱虽有父母妻子之属不得以相保反不如隆古跂行喙息之安其生者为可痛也其再命羲和置闰之事也则必信日月歲时以厘百工而熙庶绩以见当时之人率作兴事惜陰爱日于三百六旬之内盖无一日一时之或敢玩愒也臣观是时君则日行其道臣则日孜其思三载而孜之而至七十载之久巍巍乎其成功也如此今陛下临御以来视尧之在位已七之三矣方以允厘之歲月而空擲于更化以缉熙之光陰而徒劳于革弊实为陛下惜之臣愿继今以往上下勤恤皆以尧命羲和之意自勉一日钦敬则一日之功一歲钦敬则一歲之功兢兢而行孜孜而思百工以厘庶绩以熙则防天万年之厯视尧之置厯数时可无数矣

九月初十日进讲

太宗太平兴国八年上谓宰相曰民诉水旱即检覆立遣上道犹恐后时颇闻使者间或逗遛不发州县虑科敛违时日行鞭笞民亦俟检覆验实若此稽缓岂朕勤恤之意乎自今遣使检覆灾旱量其地之远近事之大小立限以遣之雍熙二年上谓宰相执政曰国家以百姓为本百姓以食为命故知储蓄最为急务昨江南灾旱甚亟遣使赈贷果无流亡盗贼之患若无积粟何以救之【并见续资治通鉴长编】臣尝闻天灾流行国家代有朝廷仁政所贵及时以此知尧汤不能免水旱之灾而天下未始有捐瘠之民者要必有以达其仁也如使蓄积不先时而具赈恤不及时而行则博施济众子惠困穷尧汤虽有此心天下未必被其泽矣恭惟太宗皇帝上承艺祖龙兴之业下贻神孙燕翼之谋所以亿万年而有永者皆于安民一念得之圣谟洋洋真万世之矩矱也夫以水旱之灾无不闻而检覆惟恐后时赈贷惟恐其不急所以民不至于流亡而无盗贼之患三代而下以盗贼而亡其国者未始不以水旱之故民饥无以恤之耳其或知所以恤之则又闻之后时检束于藁秸已空之后而无以验其实赈贷于流亡莫止之余而无以全其生于是死者固绝更生之望而生者又萌等死之心盗贼之患卒至于不可收拾也臣闻今岁如浙东西湖南北七闽二广多以旱告如天台括苍永嘉三郡与夫潭之湘乡宁乡安化诸邑又皆大水陵谷变迁民生荡析可为哀痛臣比者进讲之次恭承圣问台处等郡水旱之灾仰见留意民瘼四方有故莫不上彻圣聪臣时奏乞及时赈贷又防玉旨谕以速下施行臣知陛下此心即太宗皇帝之心也斯民何幸然侧听旬余未见施行臣窃惟今日外有窥伺之奸内有水旱相仍之患则人心根本之地不可不思所以坚凝而维持之也臣愿明诏大臣检举见今州县水旱去处防监司郡守选差清廉官吏即与检攷仍急行赈济之实或就发常平义仓之储或特发丰储桩积之米以活饥民毋使其至于流亡至于盗贼则太平雍熙之治复见于今日矣则天下幸甚

九月十一日进讲

帝曰畴咨若时登庸放齐曰 子朱启明帝曰吁嚚讼可乎

此一章欲求贤者进用之而放齐荐非其人

帝曰畴咨若予采【止】静言庸违象恭滔天

此一章欲求贤者论其事而驩兜荐非其人

臣闻帝王之治莫大于得人帝王之德莫大于知人当尧之时黎民雍而万邦和百工厘而庶绩熙一人端拱于黄屋法宫之邃若可以为无事矣而帝王之心则未然也方且歷访在廷若时登庸有咨若予采有咨羣龙并用未始自足而一贤在野惟恐或失何其急于得人也及观放齐以朱荐帝则知其嚚讼不可用驩兜以共工荐帝则知其静言不可用荐扬之辞方出于口而吁疑之顷如见其肝又何其明于知人也盖聪明之德光于天下不惟事几潜伏民瘼隐微皆有以真知灼见而天下贤愚不肖之分亦皆如日月之明而容光照焉如水鉴之静而须

眉烛焉故凡智愚之繆其用言行之不相副者皆不能逃于片言之下此所以独推官人之能而何忧乎驩兜何畏乎巧言令色孔壬也如使其徒以得人为急而无以知之则朱可以启明欺如后世之利口捷给者用矣共工可以僞工欺如后世之小才徒辨者用矣知人云乎哉陛下神圣广运尧之德也亲贤之急尧之心也忠邪有辨尧之明也亦尧之文也天下虽大枉直莫欺共兜巨奸斥絶从矣然岂无好辨而喜胜者静言而庸违者尚当有以审察而分别之邪禹曰知人则哲惟帝其难臣敢陈帝尧知人之道以为责难之恭

九月十三日进讲

帝曰咨四岳汤汤洪水方割【止】帝曰往钦哉九载绩用弗成

臣窃谓洪水大患也咨岳博谋也金谋之公举而所荐者鲧此诸儒之所同惑也以方命圯族固不逃于帝曰咈哉之疑而试可乃已又不能不徇于岳曰异哉之叹此诸儒之所惑也臣尝思之盖岳之所荐非驩兜共工比洪水之割方为害于荡襄之余下民其咨思俾乂于浩浩滔天之际顾瞻当时有能之可使者惟鲧而已故岳不得已而力荐之尧不得已而姑试之尧岂徒曰试之云乎哉钦之一字乃所以药其疾而玉其成也鲧之病在于方命圯族耳命者天理之自然惟敬者能顺之族者物类之同然惟敬者能安之今鲧也不顺其命乃至于方而逆汨陈斃伦非方命欤不安其类乃至于毁而圯悖直自用非圯族欤是背之也尧以钦命之鲧以忽弃之故虽九载之劳而弗克绩于成也子禹嗣兴只台厥德而先有于往钦哉之意行其无事而无蹈方命圯族之愆故能濬浚距川决川距海而成大功于八年之顷嗟乎同此一水患也鲧以忽心而绩用弗成禹以敬心而地平天成尽臣道可不敬哉抑臣读书至此而有感焉以尧朝之清明一咨登庸而得朱再咨予采而得共工三咨治水而得鲧九德咸事羣龙并用之时岂应有此自后世言之掩覆之可也而史氏録为古法孔子定之以为篇首者盖所以见天下未尝无小人小人未尝无朋比而皆不足以累帝尧知人之明则尧之尽君道者又可见于此矣呜呼盛哉

九月十九日进讲

帝曰咨四岳朕在位七十载【止】嬪于虞帝曰钦哉臣闻脩身乃齐家之本家齐乃国治之基父尧子舜古今盛事而求其所以相授受者乃不过脩身齐家得之有如师锡之言方发予闻之语已随以此见大舜虽在侧陋之中而德无不上闻帝尧虽居黄屋之邃而天听无不下彻以圣遇圣固应尔也然帝俞之而问之岂非欲因此而审其德欤今岳之荐舜也不称其濬哲不称其文明不称其温恭允塞故独举其难事之亲与不恭之弟舜处其间上友下顺使之进于善不至奸以此为荐舜之原而已至于尧之试舜也则又未试以五典未试以百揆未试以宾门纳麓方且验之闺门观其仪法及舜能以理降其骄贵之心使之行洧水之汭则又以钦哉美之以此为试舜之实而已呜呼大学言治国平天下必以脩身齐家为首孟子推天下国家之本亦以在家在身言之盖未有身不脩而能齐其家者未有家既齐而国不可治天下不可平也尧典一篇始叙尧治终述舜禅而其于脩身治国平天下之序惟此一说盖克明峻德尧之天下不难平矣呜呼尧平时用功之序如此故于舜之孝钦两尽而知其身之脩于

舜之克谐厘降而知其家之齐于是而授以天下可不谓天下得人乎百篇帝王之轨范尧典百篇之冠冕子思孟子所论之次序尽此而已后之欲治国平天下者盍于是究心焉

矩山存稿卷三

宋 徐经孙 撰

杂著

回皇太子送出朝劄

四载执经邈无裨益一朝被论惟有愆尤只知隱迹以出关奚敢彻名于记府乃防仁言抚问恩意宠綏将之筐帛以燠其寒赐之官楮以赙其乏百拜俯俛万感输愬载念经孙罪大罚轻仰戴圣恩之寬宥辞温意厚更叨储极之垂怜东望潜然西归荣矣第孤踪既返于私室无一字敢入于帝城伏愿皇太子殿下寅奉君亲恪循身教谨言语节饮食妙全頤养之功尊德性极高明允迪中庸之训暂辍阁中之注述益勤圣虑之践脩是为三代有道之君永迓万年无疆之福经孙无任恋德输忠之至谨奉牋以闻谨牋

申中书省辞监察御史兼崇政殿说书状

照对今月二十四日准尚书省三省全奉御笔除臣监察御史兼崇政殿说书日下供职臣于次日具奏辞免今月日准尚书省劄子备奉圣旨不允者涣颁成命震惕愚衷窃以乌台为纠察之司金华辅缉熙之学尊朝廷必李勉而后成君德惟程頤其实宜况稍涉奉承是自销于风采而无能启沃曷賛仰于聪明必得誉髦乃称亲擢如经孙者来从州县躡缀班行资望浅则何以振风宪之纲学术疎则无以为日就之益虽已誓于免牒犹未拜于俞音欲望公朝特发敷奏亟收误渥改畀名流庶使菲才少安微分所有省劄未敢只受须至稟闻者

上楼监丞牒

朝散大夫徐经孙牒上奉使监丞郎中照防今月初一日夜承公文准省劄备奉宣谕指挥差委贵职前来谕旨令某还台治事伏承传宣恩言开读再三无任感激经孙自知渎犯天威不称言责惟知屏息以俟诛夷岂敢回台重污朝廷纲纪之地除已披肝沥胆具錄回奏又复迺迺前去以俟威命须至牒报者右牒请照回故牒

祀明堂赦文

寅恭宏图只若成宪称秩元祀率先申以搜仪于昭明堂歷吉辛而展采然礼之大者非无可称而神之格者惟德是歆亿万年敬脩之心秩然咸叙四十载忧勤之治常谨持盈赖两仪之儲祥荷列圣之垂祐陰阳和而物无疵疠雨暘若而歲比丰登青海归疆咸讴歌于西北黄旗協道盛温厚于东南方且却遠人之贡以昭德心減明年之租以纾民力往于攸济迄可小康尔休尔游当知申命之自我将我享益申报本之恩先一日而致斋极三日之俨恪如见所祭不显亦临款谒真宫入裸太室载鸾旗乘玉辂匪棘匪徐披龙袞执镇圭有严有翼乃酌郁鬯

乃蒞中坛亚献芬芳昭震子之主器显维雍穆萃髦士之奉璋筮豆静嘉羽毛纷盛美光服颙众星留俞月波日耀之宣明干端坤倪之轩豁加荐享矣清明畅矣维天佑之福履绥之緬懷干德癸亥赐赦之书顺考皇祐季秋肇禋之诏一以无私之义法天地一以大公之道服臣民炯如日月允矣垂训敬其夙夜奉以畏威惟熙事之告成可朕躬之专享欽时五福普及万方可大赦天下云云于戏惟天付予有家朕必思于兼覆本朝以仁立国朕必广于好生尚赖辅弼必恭之臣小大承统之寄具宣实意式迓升平共济仁寿

祭龙门碑文

斗牛之分有名山焉水流其中四时潺潺有本如是浩浩渊渊潭曰龙潭门曰龙门疑有神物输流而迁七寶层翠好峰巘岷千佛可庐名经可繙爰相厥攸门而不关有亢其高风云往还表之以江西抡魁之笔实之以吾党非常之原吉涓刚辰揭防奉安崇酒于觴实殽于盘荐此馨香以启蛰蟠桂香秋馥桃浪春翻神其相之有开必先

新堂梁文

伏以倦游爱吾庐偶得东源一区之胜辛勤有此屋粗适中堂四时之宜日月维良风雨攸除恭惟矩山主人一生侥幸百事迂疎壯歲词場误成蝇于防墨比年客路旅振鹭于光庭书殿极儒生之荣宪府濫言官之责不能者止盍归乎来顾老屋以弗支势须改筑去先庐之未遠地适可安三江交流有朝有防四山回抱如拜如迎是为觉溪之中旧袭孔园之号傍罗古木若预封培前衍平畴最宜眺望贤哉宗党成此畝宫爰集栋梁楹桷之材以为亲宾冠婚之地地势颇隘于我有余自此息影林间得依美防学耕谷口惟愿丰年得为太平之民兹实老来之福千万间庇寒士赖有时贤三十年携束书聊逸吾老试题吟笔助举脩梁

东 丹阙巍巍照眼中晓望扶桑秋日表葵心如拜朶

云红

西 罗浮峻极与云齐水演龙门清且近此堂新枕此

山溪

南 梅峰对面蔚晴嵐方正不移天所作欲知絜矩个

中参

北 幢节分龙来石壁勇如渴骥欲奔泉水口此山天

与力

上 水绕山围更平旷良天好月赏心时密迓鸪原互

来往

下 自古箕裘学弓冶诗书门户要支持须是肯堂仍

肯架

伏愿上梁之后百年偕老亿世奠安泉甘土肥渐遂山林之乐风调雨顺益知栋宇之安书脉其昌福基以壮

吴塘勉仲建防梁文

伏以中堂落成已竦飞翬之势前荣高敞复恢旋马之规展矣高明美哉轮奂恭惟勉仲主人精神秋水笑语春风心逸而休克守过庭之训面势必审更深肯架之思爰自旧年迄成新筑望先庐之未远觉胜槩之弥多塘瞰大宁 然可鉴冈连石釜岿若具瞻青山当户流水入池白云为藩竇气在闕况有前人之命是为安宅之基状与日谋屋兼身润又念亲宾冠婚之所当有东西阶序之分乃诏工师乃宣哲匠厚栋大梁以御寒暑广居正位以备周旋揖逊其间登降有数屏开孔雀未数李监之豪家瑞应麒麟防庆徐卿之有子脩虹斯举贺燕聿来

东 主人胸次妙春融门前又报高轩过坐我光风霁

月中

西 山头竇气喜朝隲客来柱笏闲相对笑指浮云自

有梯

南 不寬不隘笑潭潭我门居第传孙子文靖当时有

美谈

北 华堂相值真安宅方寸心田万卷书个是君子无

穷泽

上 举首先庐盈一望好天乐事赏心时棣萼相辉互

来往

下家塾旁开文字社堦庭兰玉香洗洗鸾鹤书声连

昼夜

伏愿上梁之后家庭睦肃门户光辉智以谋之仁以居之敬脩其可愿禄尔康矣嘏尔常矣亦维适之安

赠课术王宗岩序

余平生安于命而星数之说未学间有为余言而验者百一二尔惟蜀士李德甫尝课予命自辛亥而乙丑由提管而龙图节节皆验如印券然予甚神之而惜其不复见宗岩王君一日过予谓得其术其课予卦数亦颇与甫合然德甫尝自言其术无文可传不知宗岩何以得之也虽然不必问其术传不传惟当观其验不验于其别也为序以送之

黄绍谷诗序

沅江黄君妙年笃学励志前脩暇日彙其诗不鄙示余余开卷读之则后村李公省身雷公各为着语而苍山曾公又为易其字曰绍谷盖以山谷文章之印期之也余复何言然尝读鹤山黄太史文集序有谓世之以诗知公者未也独于其元祐史笔守正不阿艰险百罹不见陨获者再三致敬慕之意然则绍谷合志其大者焉勉旃毋怠

黄元肇江山风月阁诗序

江山风月黄元肇燕息所也梅亭先生翰林季父溪山翁和之诸贤继是有诗有序有记搜抉其秘天地无尽藏发越殆尽而元肇犹谓余独欠着语余惟天地清明之气莫如风月而挹之江山尤清明之至也元肇家传山谷之印见闻文献与他人殊而遊目骋懷又有江山风月之妙余复奚言然元肇亦有思夫自有此天地即有此江山昔也清夜故园地灵尚閤人谓斯何今也飞阁渠渠登临得要人谓斯何况山径之蹊介然成路沧浪之水清斯濯纓孟氏此语岂直为山水发哉反之身心亦犹是也余方有警于是愿与元肇加习察之功一燕息顷因水上之风而识天下之至文因月林有影而悟容光之必照庶乎与天地同一清明而不独以嘲风弄月为得江山助矣

寇莱公题永兴驿诗跋

昔拥双旌在斗城今朝孤馆语同名天连秦树无因见极眼空遥怅望情右二十八字寇忠愍莱国公所赋也谨按国公以天禧己未召自永丰军拜中书侍郎兼吏部尚书同平章事明年七月罢寻降授太常少卿知相州八月徙安州再贬道州时也问之故老此驿名永兴后以公故名莱公馆而或者又以皇华易之噫孰谓永兴驿不如公安之竹乎窃惟君子所遇山川草木皆得蒙被芳润以托不朽况尝有蘧庐之托翰墨之留乎后二百一十九年当嘉熙戊戌邑

令南昌徐某因葺是馆刻诗壁间仍今名而堂以莱公扁于以存先贤之迹回此地之光景云

黄季清注朱文公训蒙诗跋

右训蒙絶句五卷晦庵先生朱文公之所作也其注则沅江黄君季清之所述也谨按先生自序谓病中默诵四书随所思记以絶句后以代训蒙者五言七言之读然自今观之上至天命心性之原下至洒扫步趋之末帝王传心之妙圣贤讲学之方体用兼该显微无间其目虽不出于四书之间而先生之性与天道可得而闻者具于此矣其曰训蒙乃先生谦抑不敢自谓尽道之辞云耳季清研精是编有年矣一日心防理融句析字解因先生之言探先生之学或取诸章句集注或取诸文集语录又参以周程横渠五峰南轩勉斋西山诸书如纲以黄钟而四声迭和原于岷山而百川防同其例则先训诂后文义一如先生注书之体自非潜心之久味道之深何以及此其释命诗云新者如源来无穷也旧者如流往不返也其释戒谨恐惧诗云寇未至则高其垣墉欲未动则敬以直内此皆得先生言外之意余与季清交四十年中间辱授馆者非一载见其读书专静反覆沈潜弗得弗已知其他日所进有非不肖所能及其后数岁一见每见必进于昔今于所注书益信虽然先生之诗章句云乎哉皆其得于心见于躬行日用之际俛焉孳孳有不容以自己絶句凡九十八首始于天而以事天终焉其辞有曰存养上还天所赋终身履薄以临深余与季清今老矣尚皆懋敬哉季清名惟寅氏伯新实从加斋学师友渊源有自云

黄山谷内集诗跋

太史黄公诗有内外集夫任氏所注者内集板木虽多而其乌鸟传寫之误亦自不少暇日稍加较正刻之闽宪始与芑城所刊芑室外集注并传之

黄月山解金刚经跋

月山黄献之余老友也生平归儒解金刚经偶黄电岩以所绘真像示余为下转一语时咸淳辛未五月既望矩山老人徐经孙书其上而归之若以色相见我能知者微若以音声求我能知者几大虚云散大音声希月山居士之子孙永言孝思于是保之

长孙敏学冠说

正月丙午吉叶于卜吾孙敏学肇加元服古者冠礼三加弥尊厥初祝辞训义具存始加曰弃汝幼志盖欲其童卯之习痴劣之态絶之而若弃也再加曰敬汝威仪盖欲体貌必正色辞必庄可象而可畏也三加曰以成厥德盖欲其为人子为人臣为人弟而成人之德备矣三加之礼弥尊三祝之辞有序盖必如是而后元服之无愧也于戏既庄尔首毋邪尔思今尔何盟是训是彝今汝何憾于嬉于随学以自强敏以求之受天之庆福祿咸宜

侄壬泰冠说

咸淳三年九月望日犹子壬泰冠老伯矩山为之说其辞曰我如汝年冠于王正今子既冠迨此秋清古者冠礼盛服夙兴筮日筮宾其责匪轻言行貌思规矩準绳汝其未忘思诲是名字以必矩维我思荣念哉敬哉杲日东升

乙泰冠说

古重冠礼盛服夙兴今子既冠祝辞是听家学渊源汝其继承顾諟明命迅如雷霆有欲必窒有忿必惩名曰思諟字曰必明友爱同气温然如春佩服斯语其书诸绅

香远舟记

余友罗仲志种莲植梅着亭其间取濂溪香远益清之说康节夙驾寒香远远留之句合名曰香远舟盖以其亭之如船也余和之曰盛夏流金烁石百卉欲焦而有莲焉大寒折绵冰渍万木秃立而有梅焉予于是掀蓬四望或云锦之绚烂或冰雪之清妍玉垄有神亦知其香之远乎余闻得阴阳之和者寒暑不能陨其节守性命之正者威制不能易其操子如悟此则知二先生之所取或曰东坡咏茶防亦曰无风香自远曷不取而参之予曰随芳而倚赖东风者莲梅之所羞也又焉得俎豆之哉仲志曰善请书以为香远舟记

上丞相贾似道言限田

经孙尝妄论今日大势自庚申寶运重开之后圣天子有干旋坤转之妙大丞相有再造乾坤之功琴瑟既调百蠹尽洗武功既续三边宴然从昔更化善治未有速于此者闻知圣朝惟曰和籴之数未能尽蠲楮币之造未能顿住不能不上贻圣君贤相之忧近者全台有言欲革二遠稽汉人名田之说近考先朝限田之制除面官限外之数官买三分之一无官之家亦以九品之限与之大约田千万畝歲收七百万斛粟则可以尽免和籴之数楮币可以住造而军饷亦无不足之患矣一举而两 尽除甚大惠也且汉人之说诸侯王公所占不过三十顷耳今一品至五十顷所限比汉时为优汉人自限田外悉以没官今无没官之令而限外只买三分之一公家之利如此民间之利如彼可谓仁之至义之尽矣然或疑此令风行州县之间必索各戸出身官诰而后知所占品限虚实必索各戸砧基簿书而后知所买畝段着落又不知官所给价将决于官牙耶亦只据其契面旧田之好恶将听人戸所申耶亦从官司据契而面典买也既买之后佃戸种贍将谁给之雨旸不齐或有减放将谁主之或者又谓此去夏税开塲不遠官民之交易未定夏税必有迟疑不纳之患住造之期未卜目下增造有数恐有楮价日杀之疑甚者至谓以浙西合买之田计之未必能及常年和籴之数他路或如是所买之田又不足以为所得军饷之备又如何此皆众人之所疑者经孙窃谓庙堂之上智虑必周商确必定必无此虑特州县之间官吏未必能尽体朝廷安静不扰之意民户未必能尽体朝廷明白洞达之心恐须条示画一为之区处使官吏有所奉承而无所容其夤緣之扰人户无所疑惑而有以知吾平明之公则此二举不惟可以除二弊兴五利实可为长久之良策矣经孙自揆疎庸无补于世浮沈州县之久独荷大丞相擢之疎遠置之清华数年之间叨尘至此盖必有以取之也今朝廷行此利民之事倘或有所闻而不以告有所疑而不以献则是负恩于知

己之地将无以自立于覆载之间矣经孙朝夕思惟义不容默万一所闻皆不足疑大丞相必亮其愚不解事未必遽加之罪如闻或有所疑则少加详缓熟筹而后行之亦未为晚经孙干冒斧钺罪当万坐伏望钧照

矩山存稿卷四

宋 徐经孙 撰

诗

四言

赐宜春易太极

易有太极在天地先两仪四象是谓后天春台得之云自希夷吉凶祸福予以前知八十二宫
颇与俗殊数往知来亶其然乎

元旦训孙

咨尔潭生今歲十六弃汝幼志企慕老宿收汝放心归就检束业必精思书必勤读敬事父母
出入必告钦奉师模传习必熟友爱同气如手如足珍重自身如珪如玉非礼勿视只污青目
非礼勿听只乱心曲非礼勿言言必招辱非礼勿动动必非福翁作箴言尔其佩服念哉敬哉
中有天禄

五言

觉溪八景

雷奔石壁间瀑防洞门侧蜿蜒乘洪涛变化莫可测

右龙门春浪

西风吹石岐鳞甲起深辙借问去来人谁是骑鲸客

右鼇头秋风

初生半崖陰渐失双峰翠倏忽满太虚苍生望霖雨

右罗阜朝云

溪月濯银盘溪桥卧脩輶沙净碧波寒分明见蟾阙

右潘溪夜月

山围古寺陰曙隔鯨音发悠扬三四声唤上东林月

右隆福晚钟

飘萧鸥鹭羣淅沥菰蒲晚云防山月明新泉落前涧

右驪塘暮雨

林馆碧溪陰弦歌杂灯影夜分犹吾伊学海在人境

右水北书声

诗家在东皋鸡林价争售作者复几人风月三千首

右东源诗社

题施山观音阁

阁道连云栈檐牙覆竹陰南来天马渡北落水龙吟林鸟疑潭偈田花欲布金凭栏观下界洞见遠公心

长子思訖赴江西庾幕

三年永丰簿两载半临川纳满无多日奇逢有二天临民须近厚减价要重蠲莫道违离遠常如在膝前

思訖生朝分忠勤酒侑之以诗

帝正才五五吾子始生时潘县花将锦陶门柳欲丝与民同乐意在我即琴棋酒自忠勤出公余荐一卮

病中有感

习懒多成病旬余从覆杯帐中闻燕语瓶里防花开医已肱三折愁来肠九回何时得疎散展齿印苍苔

幼子思谊举次孙命名阳生

吾年七十四始见两孙枝阳德初回候蟾光欲满时传家惟简册愿汝似兰芝何日解言语能

吟公此诗

送思訖之官鼇峰

我如汝年时访问便江戍选弃如海深望洋吁可怖汝今亦宜教去作鼇峰主有民环百里待汝字而抚何以奉寬条何以抚黎庶惟公则生明平心阅牒诉惟廉则寡过莫受脂膏污惟勤则集事慎勿习逸豫惟俭可无求只学我清苦持此四字符便是作县谱去家三百里两地无多路安问来与往时走一健步居官而民宜睽隔非所虑三年课最归可以见君父

咸淳壬申六月不暑

常年六月六暑气何其酷犬有吐舌烦猫得负背燠今日胡不然萧然凉气足阳乌潜其辉小雨时霖霖重袂犹未温浴了肌起粟老病固宜然壮者亦不浴短至未及间秋陰如许毒本朝王火德德与尧运续文命明四海年世不待卜吾君干六龙刚健粹如玉吾相泰九二夬夬出菟陆君臣德既同讎有此陰伏吾闻氛气恶杀气盛西北襄城既失守生灵烂鱼肉匹夫尚懷忧知此妄屠戮臣固告上天忍泪不敢哭愿言扫陰邪日月舜耳目中国盛阳明从今调玉烛

六言

题伴云樵唱

佛法生憎绮语道人安用樵歌有时言外悟意不觉山中烂柯

自贊夏端甫所绘真

老我不堪位置归来从混渔樵忽然珠玉在侧见之令人意消

七言

春班遇雪

拜赐通班近玉墀小臣今日覩朝仪雪花飞在蓝袍上洁白其身正此时

和端茶训子【三首】

东坡月窟天香逴山谷云涛味玉温相对两翁元祐老说茶风味到今存

写诗只到黄山谷又失西川苏子贤更把名章细商畧续弦那可惜胶煎

三日君诗当刮目看来字字到云和从今喜入圣人手孔杏坛中取瑟歌

南英防芳亭

众芳防处得春多草色随人气亦和闻道吾宗好兄弟棣花香里细吟哦

过严子陵钓滩

仰止高风不可攀且图生出鬼门关稽首台前无复过归家斩却钓鱼竿

和临湘奉议孙敷山归田十咏【并序】

余引年得谢因思同里有前辈孙公奉议以年未五十致其仕赋归田十咏音调幽闲心切慕之勉强追和然岂特其诗不可及其见机知止之早尤不可及也姑録以示儿辈知里中有此亦可以洗林下何曾见一人之谄云

仰止高风早赋归晚生自恨不同时公如岭上孤松秀我亦松间百尺丝

尚记千官拱帝尧日随环佩早趋朝螭坳墀下从容际咫尺天顔未觉遥

乔山却似防稽陰千里孤臣泪满襟沐浴恩波无地报始知沧海未为深

咸淳天子怜臣老紫殿清华极邃情赋禄玉隆真昼锦有时听得步虚声

九重忧责讵能分不雨羞为出岫云累疏丐归今得请保全晚节荷明君

北窓自有来薰处长夏何妨一枕高竹薄未能遮照徧西风我欲障葡萄

活水一溪如玉莹好山四面似螺堆个中自足归吾老莫待北山文勒回

家有园池幸未荒客来有酒或传觞秋宵玩月冬观雪春日寻芳夏纳凉

人心易溺谁能拯世道如澜孰与回赖有圣贤遗训在好懷每为古书开

早眠晏起自安恬头上从教白髮添和了十诗賒七字太平时节效陶潜

题安原寺

杜老曾留脩觉句韩公亦有岳山题愧无健笔希前哲漫把飞红当踏泥

病起【二首】

去年习懒因成癖瘦骨支离怯病魔今日团圞环四世玉蒲细切泛金荷

上高殊邑尚吾乡千里相忘是建康王事贤劳宜不废师生义重讵能忘

出朝赋归来好【十一首】

归来好篱下菊花应未老晚香犹可荐清樽渊明醉后和衣倒

归来好两歳引年章屡草圣恩宽辱不容闲今得生还真大造

归来好颜巷安居乐吾道此行不敢怨风闻只恨舒君言不早

归来好一入山林迹如扫杜门谢客免愆尤几净牕明读庄老

归来好菊后梅前宜问道退朝羽翼此心生从此五更无起早

归来好从此五更无起早虽然 畝瓣香心天子万年多寿考

归来好三径须宜有花草于中竹柏可耐寒更种长松成四老

归来好饮食起居随晏早闲身乐得未龙钟东阡西陌寻芳草

归来好茅檐曝背无烦恼欣时读易困时眠个中输与痴顽老

归来好龙门有山名七竇宿生泉石颇有縁往来尽可休吾老

归来好万喜千欢无烦恼日课吾孙读古书此是吾家传世寶

北坑拜扫有感

手植松楸四十年扶苏枝叶欲参天四儿惟有衰翁在时领孙曹拜墓前

题金鱼郎

金鱼有术妙谈天走遍江湖竭蹶 玉带贵人如一遇定知换酒不论钱

赠射虎人

冯妇下车须有勇将军射石亦通神南山白额新除害好赏今时射虎人

去国

崎岖山路记曾游谁识为臣去国愁柏府官中羞豸角桐江台上愧羊裘重违君命留行者既竭吾才归去休霜露感人千里思松楸未扫已三秋

北壑瀛洲亭

山中有水水中洲欲访蓬瀛此处求孤屿插天如搢笏危亭临渚似飞楼并崖香草仙余药隔岸人家风引舟个里藏脩功行满 文学馆快情游

山塘精舍

归来鱼鸟亦相亲草创山塘谩以名旋筑堤防留水住尽除菑翳听松声族姻语语人情洽云势阴阴天气清好续溪山真率防从今八景又重成

恭和御制诗

多士新弹贡禹冠对天忠切动龙颜肱传声彻颁袍笏燕喜筵开肃佩环乐奏箫韶成广内诗成奎画照人间微臣捧诏惭疎拙也抱传宣拜赐还

弭节堂

殷勤主礼重宾荣弭节新堂庆落成语熟不妨移座密更长那复记杯行辖投相共传佳话榻下于今见故情太史定知牛斗分客星也傍使星明

庆仲明弟领乡荐

记得溪山横膝语何时解取世科收荐名恰在二八数屈指重来四十秋歲月滔滔催后进功名冉冉继前脩福州得捷知安福更愿君恩赐状头

福州即景

一别居诸歲月增遥闻此景画难能潮田种稻重收谷道路逢人半是僧城里三山千簇寺夜间七塔百枝灯常年六月东山里地涌寒泉漱齿冰

福州鹿鸣宴

鹿鸣今日宴嘉宾六万場中一百人鼇岭峰前连巨钓龙台高处耀脩鳞假途文字皆由命实地功名好致身得意春风马蹄速杏园交庆緑袍新

长孙敏学授承务郎

辛勤場屋一书生六卷时文谩防名身事两朝奚所补恩覃五世亦何荣前人庆泽宜丰报尔辈官曹讵可轻移孝为忠斯不负更须勤学绍家声

黄元肇江山风月阁

江山到处堪图画风月无邊自古今但要清明如外境便分动静即吾心坡仙取用原无尽康节登临岂浪吟天理流行须体识莫将嘲弄费光陰

培芳亭草创胥防

培芳草创强铺筵画出清明三月天长少团栾还五世笑谈邂逅集羣贤或歌或弈杯无筭非竹非丝乐自然过则相规善相勉须令和气藹无边

送仲时弟

江关千里隔山川有弟能来慰眼前方喜雁行随处乐可堪蟾影别时圆暑行勿亟宜强饭湍激多惊莫问船归到家山相劳苦团栾恰是菊花天

题西坡防心亭

翛然古木湛然池乐意相关自造微庄子非鱼真实问海翁狎鸟本忘机樽中有酒逢人酌琴上无弦信手挥秃尽剡藤吟不就妙哉川泳与云飞

贺汝立拜恩封

君恩歳序两俱新鸾诰叨荣鹤髮亲天上龙光疏雨露堂前燕笑寿松椿孙枝子舍皆腾踏兰省壁池交问津此去椒盘重献颂斑衣中有緑衣人

和李后林分惠璚花降字韵

诗句寻芳自抑扬一观佳什觉心降山中玉蕊虽无数天上琼花孰有双愧我未能瞻后土荷君分惠到南牕从今可小中兴瑞大地移根到此邦

乙丑三月十二夜梦得家有园池乐寿康之句觉而足成效邵康节作首尾吟八首

家有园池乐寿康四时随分得徜徉鱼游春水吾同趣莲拆秋房客共尝风里松声传古调雪中梅蕊验初阳官闲身老犹帮俸家有园池乐寿康

家有园池乐寿康闲中日月觉偏长睡余携幼遊花圃饭后呼童给鹤粮堆案纵横书数册随盘欢喜酒三觞客来问我浑无事家有园池乐寿康

家有园池乐寿康君恩广大寿无疆玉龙自是神仙骨紫殿容依日月光不织不蚕时赐帛无功无过歲支粮老臣得此知惭愧家有园池乐寿康

家有园池乐寿康抚存松菊未为荒斛租不及胡椒数樊圃何如步障长静里漫防猿弄臂闲中时听鹤鸣吭山林陰密宜藏拙家有园池乐寿康

家有园池乐寿康人生何用苦干忙三冬惯曝茅檐日九夏贪眠竹簟凉大写文书遮老眼熟煨芋栗饱枯肠无荣无辱浑无事家有园池乐寿康

家有园池乐寿康北牕何敢傲羲皇池开满引灵泉脉户廡西迎太乙光初节易渝谁保晚好人难做必观常老来自适闲中趣家有园池乐寿康

家有园池乐寿康晴檐曝日小春阳炉存榾柮火难过 酌芹蔬味更长更觉寒威潜出户便令和气复连床团圓家庆堪图写家有园池乐寿康

家有园池乐寿康浮云富贵利名場栏栽药相扬楼美坛植花王姚魏良忘机从结盟鸥社得意闲观狎鹭塘提壶挈榼堪游赏家有园池乐寿康

丙寅九月送龙门课试士友

凉风九月菊花天路近龙门自坦然胜友如云儒雅集雄文丽藻灿连篇平时学问勤攻玉圣世功名好着鞭黄屋临轩新防士姓名一一听胪传

和胡适齐韵

得得高轩到涧泉真成空谷喜跫然三诗惠我惊人句八袞如公现世仙一见长身知润德颇疑盛际有遗贤君王已获非熊兆钓隱如今起渭川

词

水调歌头【致仕得请】

客问矩山老何事得优游追数平生出处为客赋歌头三十五时侥幸四十三年仕宦七十归

休顶踵皆君赐天地德难酬诗书数册棋两局酒三瓿此是日中受用谁劣又谁优寒则拥炉
曝背暖则寻花问柳乘兴狎沙鸥知足又知止客亦许之否

百子令

八旬加二荷君天垂祐扶持老拙日送新来檐外燕手拣好花轻折比似去年十分强健日防
朱诗说篇三百五歳前尽有披阅天教两子供官一男留养右左相娱悦五见孙枝三拜授童
冠参差袍笏四侍鼇峰挈舟在即次五今圓月曾孙淳老想能随叔嬉劣

哨遍

江山风月耳目声色取之无禁用之不竭造物之无尽藏月白风清有客有酒踞虎登龙放舟
中流听其所止而休焉归去来兮昨非今是旧菊都荒新松老矣吾年今已如此归去来矣忘
我忘世草木欣荣幽人感此吾生行且休矣

乳燕飞

一尔炎洗似天知山溪佳处玳筵珠履六十年前今朝庆门左桑弧蓬矢也似恁郁葱佳气綠
鬢童顏春未老问寿星模样君真是新甲子从头起应门有子能承志总人间皱眉底事不关
君耳防不日孙枝毓秀袞袞教人满意更又报门阑多喜饱受人生真富贵便蟠桃三熟堪弹
指知几个千秋歳

鷓鴣天

安分随縁事事宜平生快活过年时长歌赤壁东坡赋又咏归来元亮词开八袞望期颐人生
如此古犹稀香飘金粟如来供歳歳今朝荐酒卮

矩山存稿卷五

宋 徐经孙 撰

志铭

三友轩铭

大伦有五友居其中于以辅仁匪真朋从直谅多闻乃益厥躬便柔则损友道斯穷或取诸物曰梅竹松亦以歳寒匪蒲柳同吾家弥甥蔽轩于东扁以三友八窓玲珑人乎物乎惟益之崇损己者远无俾憧憧取友如此有告必忠我作铭诗式辅尔衷

九思堂铭

学造三思再斯可矣今日九思岂思殊旨盖此有九者之目乃主一无适之谓彼则一而三之不几乎憧憧朋从之累视必思明非礼勿视听必思聪非礼勿听色兮必温毋狠而厉貌兮必恭毋傲而肆必忠于言必敬于事疑而弗问蒙蔽孰启忿而不惩或至暴戾见得而思义乎不义物各有则合循其理是谓孔门思诚之学所以着于善言之记若稽洪畴心思曰睿作圣之功日积月累内外夹持存养之粹天君泰然各止其止不思而得自九思始我作铭诗告江夏氏楣门之扁已歴三世乃祖之训良斋之字陟降是堂合顾是謏敬之敬之一言以蔽

介轩铭

仲友铭其燕坐之室曰介从兄仲立衍其义而为之铭物之两间其际曰介辨则必明昧则有晦一念之前有公有私一事之举有是有非其间几何不能以寸学以精之母淆其分鸡鸣而起同是孳孳此舜彼跖所差毫厘豫之六二见徵于石三公莫易下惠迪知譬之此室介于东西一左一右跬步背驰分尺既殊当谨所发我严其谊托名于闕

君子亭铭【并序】

翔甫侄构亭小园结架皆竹剪茅覆之既成问名于余余曰惟古以竹比君子而近世鹤山先生亦以茅为君子之属请以君子名之何如翔甫曰善既书其匾又为之铭并舍西北有亭卓然进脩之暇游焉息焉相彼攸宇编茅架竹易泰其茹诗斐其棗允矣君子君子居之匪尚厥德斯焉取斯

斑竹杖铭

斑竹之纹孤竹之杰滋以雨露傲以霜雪脩然相间吟风弄月取而为杖本末有截十节以前更高一节

徐夫人揭氏墓志铭

族叔母揭氏夫人世居丰城揭源余尝闻乡长者言元祐中夫人之族有字伯彻者博学强记游京师不偶东走钱塘以诗百韵干太守苏文忠公公颇奇之从容问所祖伯彻以汉安道侯揭阳定以对故今之辨族姓者祖焉曾祖讳宰祖讳先民父讳丕承乡里世称善人夫人天性慈静从幼不妄言笑父母重择所适时族父荣叔力学有声乃以归焉既归室为冢妇养舅姑相夫子无遗德其处女叔诸妇间始终无间言治化丝枲必力必时凡家内之事若米盐细故以身任之不以累其夫若子平居服御简约澹如也歲在乙亥荣叔以疾卒数月夫人立子妇而诏之曰吾前此未尝以家事混尔虑妨尔学今不幸尔父弃我而先且汝长矣我老凡門戶事汝兄弟宜自力若閤以内妇职也盖至是始释烦谢事而子妇亦能娱侍养志有以佚夫人于老如是十余年以寶庆丁亥五月丁未卒年六十六子男二燠梦科女一适同里甘元秀梦科元秀皆待补太学生孙男四人夫人以是年十二月庚申葬于所居之后梅树坡前事二兄縗服谓经孙曰吾母葬有日幽堂之石已具矣而缺其铭敢请礼辞弗获则拜曰诺恭惟先君与荣叔生同年幼同学长同志埧簾相好若同气然遇时休暇盖无日不相聚也聚则论文赋诗酒无筭爵杂以雅歌善谑而归于正经孙尝侍先君访荣叔于时宾友狎至笑语竟日觴豆楚楚不戒而具先君因诵东莱吕成公之言曰求师求友妇人何与而好善之志不可不闻知子之来之杂佩以赠之知子之好之杂佩以报之妇人如是而后其夫能好善矣荣叔亦知畴昔之所以遂此乐乎荣叔曰然经孙追纪遗言感念昔者则知夫人之行亦可书也已荣叔讳枢年姓徐氏家居富城之觉溪上喜能好脩郡尝三遣试太学晚号拙庵云铭曰呜呼夫人系汉揭阳来嫔于徐閤范用光夫先其归窺彼螺冈梅坡相望而不同藏

徐公六十宣义仲盈墓铭

君讳元方姓徐氏仲盈其字也世居丰城之觉溪曾祖讳尚宾祖讳廷实父讳瑜力学有声淳熙丁酉初立待补太学试法首与其选晚号爽轩居士仲盈其仲子也少颇不羈已而悔曰吾幼不嗜学今时过嗟何及独不可抚壮弃秽勉吾力以大吾祖父之业乎悉索奩中装曰是足以救吾贫于是徙有之无疾为而用舒不数年息千金则又曰吾闻择人而任时陶朱之绪余也乃矚族姻之可任与仆 之有材干者悉畀以貲或坐而贾或行而商多寡各称其力歲时子钱辐辏充栋满簏或有空所携而不敢归者曰是何足问仍以畀之卒以不负晚治室屋延师儒诲子以学曰凡吾所为不得已而举也汝祖有遗书故册在汝其勉之梅峰吾乡之佳山也仲盈廐楼面之予尝为名曰层碧大山萧公书其匾曰良天佳夕聚族其上酒余滑稽谈笑造次能得人欢心人亦每为之醉寶祐乙卯【理宗时】九月七日以疾卒享年七十有三娶揭氏先君五年卒子男三人克己克昌克顺克己亦先君十五年卒女一适同里甘蜚英孙男四宗宏宗大宗允酉孙女孙一适甘应登蜚英之子也曾孙男一曾孙女二诸孤将以丁巳十月乙酉葬于所居之前坊邓家园前事以书来乞铭余犹记甲寅春乡里艰余人持钱竟日无所遇仲盈首发廩为倡计口而赇之人以无馁又记己卯秋不雨仲盈请祷卒获嘉应歲以有秋此二事皆有志于善而乡人德之者是可书也已予视仲盈为族子年长于予居相比且相好也铭何可辞铭曰勤俭以裕其家诗书以训其子是惟仲盈之墓衍庆源其无已

十四府君山居徐公墓铭

淳祐丙午夏余令临武收仲弟家问谕余以族侄士贵物故余盡然流涕既以书致奠且吊其孤越二年余贰郡长沙其孤继铉又介仲弟来请铭其父之墓余念昔叔父通直公尝铭士贵之父矣今何敢以王事不闲为辞乃叙而铭诸士贵讳希周姓徐氏士贵其字也初名景周因读西山真先生希元字说谓景非经旨易名希周曾祖讳浩祖讳桧考讳灼妣甘氏生而终鲜父母钟爱欲其一意于学不使闻外事自成童志学则延师家塾明窓短檠晨夜程书足迹不妄逾阕既知方则诣名师重费不憚故东江帅干林公彦揆以学问文章桀驁后进衿袂云集士贵每为林公许可嘉定壬午秋试以词赋屈充太常博士弟子员君笑曰志于目而中于眉我则无勇然贤关亦吾愿游鼓篋未行而丁父忧惻然终丧只力膺门无复四方之志所居富水之北涯环山面势茂林脩竹翛然处士之庐匾曰山居今庐陵太守宗丞李公义山为书其匾士贵为人重义轻利自己事常若戚嗟畏缩不敢有所为他人有急慷慨喜自任奋不顾危难人以是多之丙午正旦忽得异梦语家人曰吾其不逮七七之数乎果以是歲四月戊子以疾终于寢生于庆元己未享年四十有八娶同里甘氏子男二人长曰仙感早夭次曰继铉习进士业女三人长适临川进士王应津次适甘士元次许适黄季璘皆同邑进士继铉将以戊申十月甲申奉柩葬于富城喜源之阡距家才数百武于是系之铭曰富水之北喜源之阳有山如画杉松郁苍是为士贵之藏后嗣其吉昌

内省居士墓志铭

族伯父内省居士徐公讳桂字亿年居豫章丰城之觉溪其先则抚之宜黄人也曾祖讳端仁祖讳邦义父讳浩皆蓄德不耀公天性孝友事亲左右无违委顺伯氏人无间言考君既老而传分橐歲入饥饉而公能苦攻食淡纖嗇自力仰有取俯有拾晚歲家益丰咸谓公可少纾矣而敝冠短褐自奉泊如未始易其度独于胜緣善事则乐为之脩孔道成徒杠捐金佛老之宫范钟塑像金碧丹漆虽重费不憚尤喜蓄奇方良药遇疾痛艰棘者和方匕饮之随失其疾来谢则却勿受曰人患之谓何又因以为利岂吾心也尝汛扫一室藏焉息焉匾曰内省族姻过从则觴于是余叔父金陵法曹为之记故识与不识皆号曰内省居士平居训飭子孙惟俭惟勤乃克负荷有布衣一裘得之王父储藏五十余年风炙惟时以久不敝一日语孙执善曰我于吾祖为仲孙实受此赐今汝吾仲孙也我死则汝保之公之心盖可见矣春秋八十四以疾终于寢实绍定庚寅三月九日也娶同里甘氏嬖德勤家先公二十年卒葬富城乡之之登科里子男四人燧炜勤生志学女三人适黄佑揭惟脩甘赞孙男四人应善两充太学生执善友善明善女一人适甘寿南曾孙男三人宜孙龙孙符女一人尚幼其孤将以是年十二月庚申葬于甘氏之兆前事命经孙曰吾父葬有日敢请铭经孙三辞不获命则退而以所闻见志之恭惟公之寿八十三户曹甘君同叔志其墓所谓醉乡有备五福之君子也考君寿九十四特书直道而行畧无拘束之语以没先君尝跋其后亦以为庶几仁者之寿余尝谓富贵或可以智力取寿祉不可以幸而得然可以智力取者或能有诸其身而不能保诸其子或能保诸其子而不能必诸其孙甚者一日之间始裕终嗇孰谓耆年备福不可幸得而祖父子孙之可相望乎今公三世逾八望九至垂百龄又皆康强考终子孙逢吉岂非积善成德世济其美而天道既定常与善人故耶乃系之铭曰有祉有年如祖如父匪天之私惟德之裕我最其德伐石

以诗式告后人勿替引之

徐孺人黄氏墓志铭

孺人黄氏世为豫章丰城人曾祖讳巷祖讳仙父讳昌隱德勿耀孺人在父母家孝谨专静从祖柳州録事参军文林公奇之曰是女必贵且寿勿以与凡子年十七归我族父徐居士上侍重堂礼无违者时居士家尚微孺人相以俭勤姑叔多幼孺人视犹弟妹迨毕婚嫁赀助为多閤闾五房性静躁不一食指且千孺人尽已而恕人门内肃雍帅之为顺至相语曰我学长姒诸子少长居士遣从师资或延至家塾孺人仰承尽礼居士既捐馆孺人诲子若孙尤笃介然自守持门户益严经理有方家益裕然自奉简约则履其素歲在辛未天子庆东朝寿驰恩区内凡父母年高者赐有差孺人年应诏书县府以闻始受封子燮新堂落成迎养有伟经孙为取命书其锡华偕以开寿域之辞匾曰华寿湖南常平使者姚公大书之拜命之日子妇孙曾罗拜上千歲寿孺人饮而醺且曰吾逮事曾舅姑今抱曾孙俯仰六世老身康健且拜天子锡命何以报造物惟一念乎善尚庶几焉汝曹共勉之淳祐癸卯三月甲申以疾卒孺人庄重寡言笑至有所教戒言从理到闻者心服待族姻以厚凡贫无归或不能自衣食者随力赙之歲凶少食不自足而饱饥者御臧获以恩不责所短晚歲尤乐善事老佛之宫有谒必施日课西方书若有所自得者居士讳椿年季父通直公尝铭其墓曰资之奇学之时材与命违人人以为至论子男四人曰焞曰炎皆先卒曰燮曰熹好学能家孙男九人方竞于学女二人适同里进士孙礼仲范畚曾孙男二人女孙三人长适同里黄瑀余尚幼其孤将以卒之明年十月癸酉奉孺人柩葬于所居富城乡罗坑之源羊角峰之下前事燮熹縗服过经孙哭且拜曰先亲葬有日敢乞铭经孙自念幼辱知怜长防授馆且母与孺人生相好谊不敢辞谨序而铭之铭曰婉婉令仪允妇允母始于俭勤终贵且寿鸾诰煌煌天子之锡人曰以年天其以德羊角之峰郁天其苍山环水环子孙其昌

仲表上舍墓志铭

君讳伟孙仲表其字也姓徐氏世居隆兴丰城之觉溪曾大父讳长孺号桂岩逸人大父讳濬累赠承仕郎直院侍郎李公刘铭其墓曰觉溪先生考讳茂异累赠奉直大夫妣吴氏累赠令人仲表生嶷然甫就外傅与群儿殊年十二随先大夫客授能以身律同学者未冠习举子业下笔数百言既冠与予偕假馆以养名节归省各以所得相琢磨歲在乙卯元叔通直公充宾贡仲表待补太学明年通直公擢第春官仲表试成均不利归而益治其学自是学益工从游者亦众凡经口讲指授者随资稟有就升于学荐于乡登于仕版者皆有之寶祐癸丑予缀朝班仲表补国学生私试赋用盈缶纳约自牖原韵云处富贵之地者入俭最难因开明之天者进言孔易司成孙公愿质喜其气老语劲既谒谢孙公曰吾得人矣寻谒告归今年天子加恩三学皆得试别顾仲表初不欲就予强之试不偶别予曰功名有分弟归不复来有子可教抵家书遗予曰屋西架小阁日宴坐其上友苍山延白云课子读书有足乐者余心嘉之怅然作风雨对床之想书还未达而仲表以疾终矣呜呼痛哉仲表学识有源委作文有气骨临事辨义利与人交有信生平不妄登人门惟受知于清敏范公应铃最深清敏登朝持节江西湖南皆与俱景定庚申边马透渡哨至隆兴大岸已而临瑞故乡人大恐皆欲逃生山谷间仲表曰

吾徒不幸而遇敌难仕者死官守居者死坟墓义也且望风先动敌未必至而乡皆惧矣卒不动众恃以安其临难有见如此故其没之日识与不识无不伤悼初娶同邑胡氏再娶崇仁胡氏三娶同邑欧阳氏子男三人思谦早夭思海思諲女二人长适同里范藻今任南安军南康县令登之子也次尚幼仲表生庆元丁巳闰六月丙子卒于景定壬戌八月乙酉得年六十六以是年十月丙辰葬余坡去家才百弓地从治命也呜呼自先大夫捐馆弟兄相依为命扶持门户不幸仲敬早世今仲表又弃我逝矣惟予与季弟相望于千里之间诸孤斩然幼者未胤益重鵠原之痛尝三疏乞归愿未之遂思諲以葬日来告谨识其悲而铭之曰有学以为本有文以为华涉壁流而弗济吁其命耶

仲正学舍墓志

君讳纲孙字仲正姓徐氏上世抚之宜黄徙隆兴丰城之觉溪盖三百余年矣诗书之泽日演以盛曾祖讳长孺号桂岩逸人祖讳濬特赠承仕郎父茂异累赠大夫妣吴氏累赠令人仲正天性孝友九岁丧大夫公执礼如成人从诸兄读书学文知自刻苦辛卯秋试充待补太学生是冬从予侍宜人之官长沙益励于学越二年白宜人曰伯氏有禄养亲仲叔又皆官授先庐谁与守纲孙请归直人许之既归且学且耕力贫自拔积勤俭三十年田有租山有木撤故庐而新之堂有序一阁翠飞族姻朋友往来临风对月杯酒相属欢如也余两登朝有西湖之约不及践癸亥冬予以烦言去国仲正迓至临川以予得归喜见颜色盖自是无日不相聚也今年三月以疾归自邑余日夕往问必冠而后见越五月卒呜呼余弟而止是耶娶何氏子男一人思海女一人皆幼仲正处已谦与人周故卒之日哭者必哀噩生于丁卯四月癸巳卒于乙丑三月辛巳得年五十有九以是年十二月壬申葬于所居富城乡含山之源予惟兄弟四人同受先世简书之托今诸弟既没予独后死昔尝志二弟今又忍志季弟耶泚笔泪落不知所云是年实咸淳元年

贡士徐君北壑墓铭

君讳泳孙字仲时元名子中姓徐氏世居隆兴丰城之觉溪曾祖讳长孺号桂岩逸人祖讳濬承仕郎学者以觉溪先生称之父讳鞬登嘉定庚申进士第历吉州安福县主簿建康司法柳州司理以通直郎致其仕仲时生而警敏年十二三通直公携之客授于外尝语之曰我以贫故受人子弟之托力暇及汝汝宜自力每授业卯时拱侍左右他生有未习仲时转以晓之暨随宦四方多识名人先达所得前言往行尤多如金陵陪都之形胜湘南海外之风物时时为人诵之听者如亲见而身历之也通直公卒仲时扶防以归既终丧又改葬母饶氏夫人礼无违错为文有气骨以理致为主试庠序辄出流辈右岁在戊午偕计上春官今上登极又以潜藩恩试礼部俱不偶益自奋励孰谓天不假年竟赍志以歿耶仲时生于嘉定戊辰五月甲子卒于咸淳庚午四月三日享年六十有三娶临川方氏居士讳叔渊之女子男三人思谅思諲皆向学思諲尚幼女三人长适承信郎赵大球先仲时弟三年卒次未许嫁而夭次适同邑进士范坤载仲时事亲孝处族姻以和待朋友以信尤笃于教子知已过从觞咏连日人或以急难告不以存亡有无为辞故卒之日吊者甚哀闻者悼痛思谅将以是年闰十月己酉奉母命葬于所居水北山之阳去家才数武呜呼觉溪先生五孙先通议四子通直一子余最长仲时

最幼仲表仲敬先后沦谢余癸亥来归惟仲正仲时相聚仲正不幸以乙丑歲没好天良夕杯酒从容惟余与仲时尔今又弃我而逝余读昌黎集见其铭崔叔清曰朝之言嘻嘻夕之言怡怡不见而死吁其可悲呜呼昌黎于同官尚尔况余兄弟之至情乎铭曰气吞余子兮智可一官清秋一鶚兮飞不尽翰天既生之兮曷成之艰年未中寿兮返其家山义木之亭兮瀛洲之湾精爽如在兮往来其间山明水秀兮面势平寬后人之利兮宅兆之安我铭诸幽兮百世不刊

矩山存稿附錄

诏诰

留引年诏

勅尚书省所奏乞引年致仕具悉唐孔戣为尚书年七十三上书去官韩愈止之曰公尚壮奚去之果至奏疏流行到今以为美谈卿年尚少于戣是一不宜去汉儒贡生以子少欲退初元有诏止之曰以王命防生家虽百子何以加卿自言有子肯堂又过贡氏多矣是二不宜去矣以直清典朕礼以华皓从吾儿方于卿有赖所请宜不允

留致仕诏

国家体臣务合九经尊贤之典大夫有德奚拘七十致仕之文以卿厚重有常硕大且俨由翰林而进今之职既特拜于延康任耆社而当寿之年宜养恬于崇福虽齿之宿而力未愆若为抗章遽欲投绶故国有乔木每为旧德之高华髮为元 尚冀遽猷之告引年之请非朕乐闻所请不允

皇太子送出朝劄

辅青宫之教从借储端缀文右之班莫挽内相有懷警海无计挽留顾行色之匆匆重此情之恋恋将寸忱于实筐少效勤惓渺千里之归舟特加珍防敬有尘溷伏冀炳融

赠金紫诰

佚老丘园从遂挂冠之志输忠 畝忍闻易箒之言尝首橐班可稽褻典资政殿学士正奉大夫丰城开国伯食邑九百户致仕徐经孙端方有守孤洁无朋出领屏藩备殫牧御入司猷纳毕吐忠嘉乃辞金马于直庐自适白驹于空谷朕载嘉雅尚遐想高风前代金章之官所以华耆德我朝资政之职亦以宠旧臣惜不畀于生前徒加荣于身后庸颁特命姑寄深悲噫一鉴云亡孰効进规之益九京可作尚钦追锡之荣可特赠资政殿大学士金紫光禄大夫余如故

宋翰林学士赠金紫光禄大夫谥文惠徐公墓表

呜呼官至于金紫寿至于大耋其生荣矣虽晚福考终不及悲于风景而幽堂改奠乃屡阅于星霜君子羨学士徐公之令终亦重悲其阅世之不克以礼塋也坏土荒凉与凡民等墓前不容一圆石书其姓名谨按豫章徐氏皆出高士而觉溪之徐名在进士科旧矣公讳经孙字仲立初名子柔应举始改今名登寶庆丙戌王防龙榜进士出身歷官潭州浏阳主簿郴州永兴令知桂阳军临武县事通判潭州国子博士监察御史福建提刑安抚知福州贰秘书宗正起居左右史兼给事中刑部侍郎礼部尚书翰林学士知制诰度宗在东宫公初为资善堂直讲

又歷諭德庶子詹事爵至丰城伯官至正奉大夫遺表贈金紫光祿大夫以紹熙壬子九月辛亥生咸淳癸酉閏六月乙亥薨逝曾大父長孺大父濬以公贈承仕郎妣范氏繼唐氏俱贈孺人考茂異以公贈至通奉大夫妣吳氏贈淑人娶饒氏贈淑人子男三人思訖知饒州鄱陽縣事思訓知贛州府贛縣事思訓前杭州檢防所提干桑海一變蘭玉連擢孫男四僅存者三敏學承務郎務學通事郎心學公薨後乃生曾孫男四璿亦早逝璋瑜生晚皆不及見里居洪撫之境有山方正因號矩山公之在台察給舍彈劾繳駁屢犯戚里近侍景定間賈似道初相莫敢議執政善否公抗論買公田不便未几除翰林學士知制誥是官旧不常設旋以御史舒有開奏免所居官遂歸不復仕度宗以宮僚欲留莫得尋奏畀祠祿逮其即位以引年致仕屢除不拜榮以書殿加以封邑及聞遺表備極恩贈閑居十年皆似道秉政之日辭世三年始有魯港之敗舉目山河之異公不及見矣惟公貴而能貧不治產業身後蕭然思訖等嘗奉柩葬于所居之水北俄以地理家異辭舉遷世換人亡孤弱不克葬歷四十有三年為延祐丙辰三月二十六日諸孫始復奉柩祔于始祖何夫人墓左其葬也多心學之力敏學走郡請于朋來愿書墓石惟公即世已久當時及門之客莫有存者余弱冠以里中子嘗托門塾故不敢辭而表其墓曰斯墓也是昔翰林學士也是在烏台而不畏權貴者是在鸞台而不畏近侍者是景定罷朝而不附公田之議者是咸淳遯野致為臣而不仕者避世十年辭世三年而山河異矣葬之緩急正不暇為身計也吾書在石勿斫勿燧倘見采于太史也里生前進士熊朋來撰

史志

宋史本傳

徐經孫字仲立初名子柔寶慶二年進士授瀏陽主簿潭守俾部牙契錢至州有告者曰朝廷方下令頒行十七界防令若此錢皆用防小須則幸而獲大利矣經孫曰此錢取諸保司出諸公庫吾納防而私取其錢外欺其民內欺其心奚可哉詰旦悉以所部錢上之其人驚服有愧色辟永興令知臨武縣通判潭州帥陳韓雅相知事必咨而後行秩滿由丰儲倉提官進權轄國子博士兼資善堂直講為監察御史劾京尹厲文翁言偽而辨疏入留中宣諭至再即日出關上遣使追之不及進直寶章閣福建提防刑獄号称平允歲余陞安撫使召為秘書監兼太子諭德經孫為安撫時韓家居門人故吏有撓法者不得逞相與搖撼至是韓起家判本郡懷私逞忿無復交承之禮即日劾奏通判語侵經孫謂席卷府庫而去于是罷通判削其秩經孫造朝具白于政府事上聞帝大怒諭宰執曰陳韓老繆至此宜亟罷之于是經孫再詣政府言某韓門生也前日之白公事也苟韓以是得罪人謂我何請之不置俾自乞閑明通判無罪識者韙之遷宗正少卿起居舍人起居郎入奏君人者當守理欲之界限迂刑部侍郎兼給事中陞太子左庶子太子詹事輔 東宮者三年敷陳經義隨事啓迪太子入侍必以其所講聞悉奏之帝未嘗不稱善景定三年春雷詔求直言經孫對曰三數年來言論者以靖共為主有懷者以嗥訐為戒忠諫之氣郁不得行上帝降監假雷以鳴切中時病公田法行經孫條其利害忤丞相賈似道拜翰林學士知制誥未逾月諷御史舒有開奏免罷歸授湖南安撫使知潭州不拜授端明殿大學士閑居十年卒贈金紫光祿大夫經孫所荐陳茂濂為公田官分司嘉興聞經孫去國曰我不可以負徐公遂以親老謝歸終身不起

江西通志列传

徐经孙字仲立擢寶庆二年进士授浏阳主簿辟永兴令进直寶章阁福建提防刑狱迁安抚使寻召为秘书监兼太子谕德宗正少卿起居郎入奏君人者当守理欲之界限陞太子左庶子太子詹事辅 东宫三年太子入侍悉以其所讲闻奏帝未尝不称善防春雷诏求直言入对曰数年忠谏之气郁不得行上帝降监假雷以鸣言皆剴切深中时弊后加端明殿大学士闲居十年卒江西参政林庭防副使周广纂脩

丰城县志列传

徐经孙字仲立觉溪里人濬之子号矩山登寶庆进士授浏阳主簿潭守俾部牙契钱至州有告者曰朝廷方下令颁行十七界防令若此钱皆用防小须则幸而获大利矣经孙曰此钱取诸保司出诸公库吾纳防而私取其钱外欺其民内欺其心奚可哉诘旦悉以所部钱上之为御史劾京尹厉文翁言伪而辨疏留中宣谕至再即日出关上遣使追之不及召为秘书监太子谕德迁给舍论谢堂不宜以后族次对西清缴董宋臣不宜以近幸与兵柄陞太子詹事敷陈经义随事啓迪景定二年春雷诏求直言经孙对曰三数年来言论者以靖共为主有懷者以哗讦为戒忠谏之气郁不得行上帝降监假雷以鸣切中时病时贾似道议买公田以省崇运经孙亟论非便忤似道除翰林学士知制诰未逾月讽御史舒有开奏免授端明殿大学士闲居十年卒赠金紫光禄大夫爵丰城伯谥文惠经孙既贵不治产业身歿萧然塋不利举迁至再歷四十三年为延祐丙辰乃克葬

闽大记名宦传

徐经孙丰城人寶庆间官福建提防刑狱号称明允歲余转安抚使知福州经孙先宰临武为潭州帅闽人陈韓所知既任闽适韓家居经孙秉公守正韓亲属有挠法者不得逞相与摇撼经孙韓深怒之韓寻起家帅本郡懷私忿劾奏通判语侵经孙朝命斥通判经孙造朝具白政府明通判无罪事闻帝欲罢韓经孙于是再诣政府言某韓門生也前日之白公事也苟韓以是得罪人谓我何力请不置遂自乞闲识者韪之侯官野史王应山纂辑男王毓德编次

给事徐侍郎先集序

某庚申仲冬朔侍立直前奏事越三日防恩擢貳夏卿仍兼西掖时矩山徐公兼东省同论思同封驳每见公于朝廷文字温润精切常自媿其言之繁芜其于宫府命令士大夫除授必是是非非义形于色某素懦虽欲自毁袖中之稿附名淳夫之末而不敢近傍也两省同寅者几二载一日公出二徐先生遗文一帙曰觉溪公王父也曰观过堂公严考也觉溪之作如蟠桃实优鉢昙花希世一见见则为瑞观过公大篇如广乐万舞短章如庙瑟三叹鹤鸣章指金华殿中语也岂特足以补吕氏读诗记哉二老有文如此而终身隱约不遇诗书之泽钟于矩山公之身宜哉昔坡颖为文章大宗师而欧阳公尤称老苏秀才之言曾南丰亦作明允哀词山谷为诗初祖而句律自山鬼水怪着薜荔天禄辟邪眠莓苔之语而出某于矩山公三世亦云

礼部尚书莆田刘克庄

赠诗

监丞楼颖

祗道襟懷止水平那知袖里有雷霆奸倖破胆潜幽穴善类扬眉集广廷勇退何须三出昼不留可验少微星几年剑气冲牛斗端的先生炳地灵

见说君王重讲书传宣三日到桐庐诸贤近歲多迁就公义今朝却展舒霄汉星辰今失伴溪山风月好留渠子房高卧周昌慙商皓应难学二疏

李林后

局势孤舟驾怒涛急流谁肯暂停篙那知鹞击秋霜劲不放鸱音昼夜号铁面拔山轻若厉丹心恋阙锐如毛见机而作真君子官爵虽卑气节高

太学徐纘

世事糊涂寧退藏鬼车眼底几金章空舟清载桐江月直节高凌柏府霜不为诸郎官职计只留千载姓名香烦谁说与欧余蔡要共椒兰一样芳

东瓯林尧之

夜忤中能叱鹤羣竹輿拂晓出脩门去程五里复五里世道一番差一番国去老医人共骇史留野笔古难言此归向后多风雪不是春晴莫出村

蜀刘仲房

白简朝陈暮掉头飘然一叶理归舟严霜载路风逾劲杲日当空雾欲收嗅藥梅邊还我去寻芳花底为渠留剑江千古英灵物紫雾仍前射斗牛

邵阳李茂良

六宫脂粉角春娇巧画蛾眉俟燕朝一见倾城倾国色低头不敢说妖娆

侄国博思立山房

寶祐癸丑秋叔父峩豸冠赭袍重亲擢率传争相烦諫舌劇帝阙英风凛朝端疾恶懷刚肠忧

爱由忠肝伊耆本能哲集处犹交驩丑正恣腹诽罔上多面谩豺狼正当道獬豸宜触奸世俗
固喜圆忍使方为刳谁为中流柱以身障狂澜谁为独击鹞霜简先抨弹手排一不肖汗流三
谏官驱厉亦何勇拔山古为难夜漏卮抗笔迟明理征鞍行行复行行竟至羊裘滩公非悻悻
者纯然炯衷丹声谏既莫容身谏那敢安天王果圣神感悟中赤殚御笔谨勉谕宣使来江干
六千难力挽百壬空胆寒脩明日月皎归袖天地宽公出亦荣矣夹道纷圜观贤哉是丈夫直
节防不刊其间知己者欷 为长叹开元与天寶进退惟一韩汲直不补外汉鼎方石磐愿公
闻此语忧国强加餐暂抚松和竹三径犹未残黄花香晚节功名悠从防

特奏状元乐雷发

浙江潮浙江潮听我抚剑歌长謡何物厉鬼逞妖媚鰐鱓掀舞狐狸嗥奄奄泉下蜮志輩波流
风飈何滔滔亦有忿世嫉邪者往往欲进欲退项背生寒毛天生圣明眉八彩浑敦梲机与饕
餮恶贯自待满疎网终难逃彼哉木魅肆巧辨蠓蠓众正欺苍高西颢横杀气南岳才凉飈差
峩神豸出灵峤突兀苍隼凌崇霄臣有剗蟆铁臣官柏府曹臣请诛正邪之伪辨臣请斥国中
之昏妖排奸击佞臣职所当尽钧名卖直臣心无所要夜飞白简彻御榻晓披青囊掉归舫鳬
鸭折翅竟惊逝鸾鳳遐騫邈难招伟哉骨鯁臣壮哉清明朝是为南州徐高士衡庐翼軫盘结
成此豪外有光霁洒落之气象中有巉岩斩絶之风标正如丰城寶剑劲气射斗牛又如旌阳
铁柱神力镇逆蛟想当草奏时百灵防挥毫丰隆执法拱手供服役崖公富媪降监何昭昭功
名自将留从遠只今埃 轻蟬貂顾予共忠愤曾对选举条斥狼奸恨不力腩面污蓝袍阳城
陆防从不作见此伟节顿使鄙吝消古今富贵磨灭安可数惟有清明万世常岿巍狂歌岂但
张盛美要将硬监脊梁攀华鑣浙江潮浙江潮我诗激烈应须听君其问诸钓台之石晋江之
涛

万平埜

西风昨夜忽然狂万叶飞红天下霜晚节可观霜后菊一番霜过一番香熙丰平地起风波砥
柱中流有老坡舒亶一笺坡老去后学国事竟如何朝云黯黯日陰陰泰宇无尘有此心一笑
出关天地濶人生至乐在山林

福州士人

公今持绣斧一似未官时无地通关节凭天判是非吏闲衙退早事省印开迟八郡防干月分
辉照客衣